

Yech galo kwa'n mixë'l San Pab lo rë men che'n Jesukrist, xa' nzho yezh Corinto

Ma go wech no bizan, ¿chi wen ka go?

1 ¹Na Pab, nak da tu apost che'n Krist Jesús, porke ngule Dios da par lun widi'zh che'n Me lo rë men, no nu Sóstenes, tu wech be por Jesukrist; ²mixë'l no yech re' lo rë go, xa' nzho yezh Corinto, xa' kwa'n ngule Dios, par gak go men che'n Me, go xa' mitsumbe la Krist Jesús laxto' por ñila go widi'zh che'n Me, nela xmod ngwayila más rë men che'n Dios xa' nzhin rë plo, par nina'b bixa' lo Jesukrist, Dios Me nile' mandad rë be. ³Kina'ba lo Dios Xuz be, mbaino lo Jesukrist Me nile' mandad be, par gaknu Me go, no zi go chul dizde le'n laxto' go.

Xkix Dios por nak be men che'n Jesukrist

⁴Zilita' nizan xkix lo Dios por rë go, no nu por rë kwa'n wen, kwa'n mile' Me por go, por nak go men che'n Krist Jesús. ⁵Mine' Dios rë kwa'n wen ka' go, par ro' widi'zh wen ro' go, mbaino par ngok milibe' go xmod nak Dios, por lë' Jesukrist, ⁶por dox milu' walika ngwayila go widi'zh che'n Dios, mbaino mizobyek goi. ⁷Kuze', dub kimbëz go, zhin zhë yë'd Señor Jesukrist xtu wëlt lo yizhyuo re', gat nzhakt jwalt lo go, ni tu rë kwa'n nazhon, kwa'n niza' Dios ka' rë men che'n Me. ⁸Lë' Dios le', dubta' yila go widi'zh che'n Me, haxta or zhin zhë, yë'd Señor Jesukrist xtu wëlt, no orze' yent cho gab, lë' go

nzë'b xki tu kwa'n lo Dios. ⁹Dubta' nile' Dios rë kwa'n nila' Me di'zh, no Dios ngule go par gak go tutsa kun Jesukrist, Me nile' mandad be.

Xmod milë' rë men che'n Jesukrist

¹⁰Kuze', wech no bizan, por Jesukrist, Me nile' mandad be, dox kina'ba lo go, tutsa bile' go xigab or le' go tu kwa'n; no nalë't go, sino ke chul guzhin go, no tutsa xigab bile' go. ¹¹Nin kure' lo go wech, porke tu melizh Cloé mbi'dne lon, lë' xid go nzho rë xa' nichë'lro'. ¹²Kuze' nin lo go, porke nzho go nidi'zh: “Na nak men che'n Pab”, per más go nidi'zh: “Na nak men che'n Pol”, no nzho go nidi'zh: “Na nak men che'n Per”, mbaino más go nidi'zh: “Na nak men che'n Jesukrist.” ¹³Or nidi'zh go sa', pas gab go, nab tsa pla rë xa' kwa'n nzho xid go ba' nak men che'n Jesukrist; o, ¿pas nile' go xigab, lë' Pab nkë lo krus por rë kwa'n nzë'b xki go? o, ¿por lë Pab ngoklëi' go? ¹⁴Per xkix Dios, ni tu go nangalilëi'ya le'n nits, nab tsa Crispo no Gayo mililëi'ya, ¹⁵nes par ni tu go nadi'zht, ngoklëi' go por lën. ¹⁶Mbaino namás, mililëi'ya rë melizh Stefanas, per más men nazëtra' laxto'n, chi mililëi'ya bixa', ¹⁷porke nangaxë'lt Jesukrist da par lilëi'ya men, sino ke mixë'l Krist da par dizha lo rë men, xmod nitsumbe Dios men lo rë kwa'n nzë'b xki men, no gat nilutne kun rë widi'zh kwa'n nzhak rë men yizhyuo re', nes par niyent cho di'zh, yent kwan zu' ngut Krist lo krus.

Lë' yalnazon che'n Dios nak Krist

¹⁸Rë widi'zh kwa'n nilu' no por xmod ngut Jesukrist lo krus por rë men, par kubchi Dios rë kwa'n nzë'b xki bixa'; kwent nzhak miyizh kure' par men gat ñilai, rë xa' kwa'n kilox lo rë kwa'n nzë'b xki bixa' lo Dios. Per par be, por ñila be, miche' Dios rë kwa'n nzë'b xki be lo Dios, porke widi'zh re' nak poder che'n Dios. ¹⁹Nela nzobni' ka lo Yech che'n Dios:

Lë'da goch yek rë xa' kwa'n nizi dox nzhak,

mbaino len, yitlo rë kwa'n nile' xa' xigab nzhak xa'.

²⁰Por kwa'n mile' Dios por Jesukrist lo krus, milu' Dios yent kwan zu' xigab che'n men yizhyuo. Par Dios, yent men natsin, no yent men nzhak por dox mitse'd xa' widi'zh che'n Dios, porke yent cho gak kab lo Dios chi na'bdi'zh Dios tu

kwa'n. ²¹Nilibe' men Dios, gat lè't por dox nzhak men, rë kwa'n nane men yizhyuo re'i, sino ke por wen Dios namás, nila' Dios nilibe' men Dios par ban bixa' bid kwa'n nayot lox por ñila bixa' Jesukrist, ter par más men, xa' gat ñilat widi'zh che'n Dios, tlè't xti'zh menaye kure'.

²²Nzhakla rë men Israel ne bixa' le' men tu kwa'n nazhon por Dios, par yila bixa' men; mbaino rë men grieg, par yila bixa' kwa'n di'zh tu men, galo laka nzhakla bixa' gon bixa' kwa'n di'zh tu men rë widi'zh dox nagan kwa'n nab tsa rë men nzhak nane; ²³per no nilu' widi'zh che'n Jesukrist, Me ngut lo krus; no par rë men Israel, widi'zh re' nak nela tu ke kwa'n nirël ni' bixa'; per par rë xa' gat lè't men Israel, widi'zh re' nak gat lè't xti'zh menaye; ²⁴per par rë xa' ngurezh Dios par gak men che'n Jesukrist, wanei choi, rë men Israele o rë xa' gat lè't men Israele; par rë men re', Jesukrist nak rë yalnazon che'n Dios, mbaino rë kwa'n nzhak Dios. ²⁵Rë men yizhyuo nile' xigab, gat lè't xti'zh menaye rë widi'zh che'n Dios, per widi'zh che'n Dios mile' gan, más nzhake lo rë kwa'n nzhak men yizhyuo; no ter nzho men nile' xigab, yent kwan zu' Dios par le' Me tu kwa'n nazhon, per Dios walika lè'gaka Me más nazhon lo rë kwa'n zak men yizhyuo re' dox nazhon.

²⁶Rë go wech no bizan, bitsila go, or ngurezh Dios go, más rë men xa' gat nilibe't Dios nile' xigab, yent kwan zu' go mbaino yent kwan tsak go, mbaino ni gat nzë go ben men tsak, ²⁷sino ke Dios ngule men chigab naxeenla yizhyuo re', par le' Dios tula rë xa' nile' xigab, gab dox nzhak; mbaino ngule Dios xa' chigab yent kwan zu' tuli, par le' Dios tula rë xa' nile' xigab, gab dox nzhak. ²⁸No nu ngule Dios rë xa' natsakt, rë xa' nile' rë men yizhyuo rrajón lo, par le' Dios tula rë xa' nile' xigab, dox tsak, ²⁹nes par sa', yent cho zi marian lo Dios. ³⁰Per mile' Dios ngok go tutsa kun Krist Jesús; mixë'l Dios Jesukrist lo be par mizini Me yek be, par gak be xa' nzhak, mbaino par ban be nali lo Dios; mbaino mitsumbe Dios laxto' be lo Dios, par ngok be men che'n Me. ³¹Mbaino lè'la xmod nzhak ka widi'zh che'n Dios:

Chi nzho men nzhakla, zi dox tsak xa' por nane
 xa' kwa'n,
 gak zi xa'i, per por kwa'n mile' Señor Jesukrist
 por lè' xa'i.

Widi'zh che'n Jesukrist, Me kwa'n nkè lo krus

2 ¹Kuze', rē go wech no bizan, or mbi'dlun widi'zh che'n Dios lo go, nangalutne kun rē widi'zh dox nagan kwa'n nidi'zh rē men, ²sino ke or midizha xid go, yentra' kwan más midizha, nab tsa midizha kwent che'n Jesukrist, Me nkè lo krus. ³No or mizhi'na lo go par lun widi'zh che'n Dios, nizi da nela tu men yent jwers, no haxta nixiz da no nizheb da. ⁴No or midizha widi'zh che'n Dios lo go, nangadizhtne lo go nela tu men dox nzhak ga', sino ke milan, lè' Sprit che'n Dios milu' lo go kun poder, nayax rē kwa'n nazhon, ⁵nes par kwa'n ñila go Dios, gat nzēte por kwa'n nzhak men yizhyuo, sino ke lè'i nzē por yalnazhon kwa'n kinu Dios.

Nzhakbe' be Dios por Sprit che'n Dios

⁶Per xid rē xa' miro'b la xigab che'n, lo che'n Dios, nidizha pura widi'zh kwa'n nzhak Dios, no gat lè't rē widi'zh kwa'n nzhak men yizhyoi, o rē widi'zh kwa'n nidi'zh rē xa' kwa'n kinu poder par le' mandad, porke kwa'n nzhak men yizhyuo, lè'i lox. ⁷Per no, nidi'zh rē widi'zh kwa'n nab tsa Dios nzhak, rē xigab kwa'n kinu Dios naga'ch, or ni naga ko Dios yizhyuo, nes par mile' Dios ban be lo biani che'n Dios. ⁸No ni tu rē xa' nile' mandad, rē xa' nzhin yizhyuo re', nangont rē widi'zh re'; per chi lè' bixa' ngone, orze' nangakè't bixa' Jesukrist lo krus, Me kwa'n nile' mandad rē kwa'n nzho. ⁹Nela xmod nzobni' ka lo Yech che'n Dios:

Dios kinu la rē kwa'n par rē men nazhi' Dios,
 rē kwa'n lalta' nagat ne men,
 no ni naga gon men,
 mbaino ni xigab naga le' mene.

¹⁰Dios milu' la rē kure' lo be por Sprit che'n Dios, porke Sprit che'n Dios nane xmod nak rē kwa'n, haxta rē kwa'n kinu Dios más naga'ch, nane Sprit che'n Dios.

¹¹Xid rē men yizhyuo, yent cho nane kwan nzho laxto' tu men, nab tsa sprit che'n men nane cho xigab nile' men. Se'ska, nab tsa Sprit che'n Dios nane, kwan nile' Dios xigab. ¹²No be, por mine' Dios Sprit che'n Dios yo laxto' be, kuze' nane be kwan mine' Dios ka' be, por wen Dios. ¹³Nidi'zh no rē kure' lo men, gat lè't kun widi'zh kwa'n mitse'd no

yizhyuo re'i; nidi'zh noi kun rē widi'zh kwa'n mitse'd Sprit che'n Dios no, par di'zh no rē che'n Dios lo rē men xa' nzho Sprit che'n Dios laxto'.

¹⁴Per men xa' gat nzhot Sprit che'n Dios laxto', gat ñilat xa' kwa'n nzē por Sprit che'n Dios, porke par lē' xa', gat lēt' xti'zh menaye kure', no ni nagak zobyek xa'i, porke nab tsa Sprit che'n Dios nile' nizobyek mene. ¹⁵Per xa' nzho Sprit che'n Dios laxto', rēi nzhak xa' no nizobyek xa'i; per xa' gat kinut Sprit che'n Dios, nagakt ne xa' xmod nak men xa' nzho Sprit che'n Dios laxto'. ¹⁶Kuze', se' nzobni' lo Yech che'n Dios:

Yent cho nane xmod nak xigab che'n Dios,
no yent cho gak gab kwan le' Dios.

Per be, xa' nzho Sprit che'n Dios laxto', kinu be xigab che'n Jesukrist.

Lē' men che'n Jesukrist nilē'

3 ¹Biwi'ule wech no bizan, nangadizhta' lo go nela tu xa' nzhak dox por Sprit che'n Dios, sino ke midizha lo go nela nidi'zh rē xa' laore ngwayila widi'zh che'n Dios, rē xa' nak nela tu mē'd ga' lo che'n Dios. ²Mitse'da go kun pura widi'zh jwals, no gat lēt' kun widi'zh nagan milene, porke go nak nela tu mē'do' ga' kwa'n nab tsa chich gak go. No nela xmod nangazobyekt go kwa'n nagan che'n Dios, or milune lo go, no ni naga zobyek goi nalre', ³porke stubi kinu go xigab che'n men yizhyuo re', niwix go rē kwa'n kinu wech go, mbaino nidil go, tu go kun xtu go, porke se' nile' rē men yizhyuo, ⁴porke nzho go nidi'zh: “Na nak men che'n Pab”, per más go nzhab: “Na men che'n Pol.” Pwes xmod nak go ba', sa' nile' rē men yizhyuo re'.

⁵Pwes na Pab, mbaino Pol, yent xkwane no; nab tsa nak no mos che'n Dios, xa' nilu' widi'zh che'n Dios lo go, mbaino ngwayila goi, kuze' kad tu no mile' zhi'n kwa'n mine' Dios le' no. ⁶Na mixen go, nela tu yaye'n ga', lo widi'zh che'n Dios; no Pol ngok xa' ngulo nits xan yaye'n re', per Dios nak Me nile' niro'b men lo che'n Dios. ⁷Pwes ni xa' nidi'zh widi'zh che'n Dios, no ni xa' kwa'n nitse'd men widi'zh che'n Dios zilita' nela tu maestr ga', yent cho tsak, sino ke nab tsa Dios tsak, Me kwa'n nile' niro'b men lo che'n Me. ⁸Tant men kwa'n ñadi'zh widi'zh che'n Dios, no men kwa'n nilu' widi'zh che'n Dios lo

rë men, lal tsak bixa' par lo Dios, no Dios kix ka' kad bixa' por kwa'n nile' bixa'. ⁹Na kun Pol, nak no namás nela mos nado ga' lo Dios, no go nak nela yuo nzha'n men kwa'n nak che'n Dios, o nak go nela tu yo' ga' kwa'n michao' Dios.

¹⁰Por dox wen Dios kuna, nak da nela tu albañil xa' michao' simient che'n tu yo', no xtu men kichao' yo' lo simient re'; per kad men ñal wi' xa' xmod kichao' xa' yo' re', ¹¹porke tutsa simient nzho par yo' che'n Dios, no simient re' nak yub Jesukrist. ¹²No chi tu men chao' kwa'n or lo simient re', o kwa'n plat, o kun rë ke dox tsak; o chao' men yo' loi kun yix triu o kun ya, ¹³per zhi'n che'n kad men yaxo'b zhë kwa'n gab Dios xmod gak kun kad men por kwa'n mile' bixa'. No zhë ze', kun bël gak preb zhi'n kwa'n mile' kad men. ¹⁴No chi kwa'n michao' men yent chi gake le'n bël, pwes wen gax ka' men ze' por zhi'n kwa'n mile' xa' re'. ¹⁵Per chi yo' kwa'n michao' men yëk le'n bël, orze' yent cho kwent zhi'n kwa'n mile' xa', ter le' xa' gan nela men kwa'n nikë' karre le'n bël ga'. ¹⁶¿Chi nanet go, lë' go nak yado' che'n Dios, no Sprit che'n Dios nzho laxto' go? ¹⁷No chi cho men chil yado' che'n Dios, lë' Dios lo'x men ze', porke dox nambe yado' che'n Dios, mbaino go nak yado' re'.

¹⁸Nakidet go yub go; chi cho tu go nile' xigab, dox nzhak go por nilibe' go rë kwa'n nzho yizhyuo re', pwes naki'n gag go nela tu men yent kwan nzhak yizhyuo re', nes par gak go walika men nzhak por Dios. ¹⁹Porke par Dios, rë men xa' nzhak kwa'n nzho yizhyuo re', nak nela tu men nidi'zh kwa'n yent yek ga', porke se' nzobni' lo Yech che'n Dios:

Dios nile', nitula rë xa' nzhak kwa'n nzho
yizhyuo re',

por mis kwa'n nidi'zh bixa', lë' bixa' men nzhak.

²⁰Mbaino xtu plo, se' nzobni' lo Yech che'n Dios:

Dios nane ka, rë xigab kwa'n nile' rë men,
xa' nile' xigab, nzhak rë kwa'n nzho yizhyuo re',
nak nela tu men, gat menayet ga'.

²¹Kuze', gat ñalt gag tu men marian por kwa'n kinu xa' yizhyuo re', porke kad go mine' Dios rë kwa'n wen par bien chego: ²²kwa'n mitse'd go lo Pab, o lo Pol, o lo Per; rë kuba' nak par ya go wen; mbaino yizhyuo, no yalnaban, no la muert, no rë kwa'n nzho nal, mbaino rë kwa'n laore yo; rëi

nak che'n go; ²³mbaino go nak men che'n Jesukrist, no haxta Jesukrist nzë lo Dios.

Zhi'n che'n rë apost

4 ¹Kuze' naki'n ne go, lë' no nak nela tu mos ga' lo Jesukrist par nile' no zhi'n che'n Me; nidi'zh no rë kwa'n kinu Dios naga'ch, no par lu' noi lo go. ²Pwes, tu xa' nikë tu zhi'n, naki'n wei' xa'i wen, lo rë kwa'n nile' xa'. ³No na, nayat laxto'n ter rël go xmod nak da, o mis rë gustis yizhyuo re' wi' bixa', nabei chi nilen kwa'n wen o kwa'n nakap; no ni mis na, nagakt wi'n xmod nak da, ⁴porke gat nize'nt da chi nzhapa dol, per gat lë't por kuze', gat kinuta dol; pwes lë' Señor wane xmod gak da, chi nzë'b xkin. ⁵Kuze', nagabt go kwan ñal tu men por xmod nak xa' lo Dios, or naga zhin zhë or yë'd Jesukrist xtu wëlt, orze' lë' Me ko' al tich rë kwa'n nzhuka'ch, mbaino rë xigab kwa'n nzho laxto' kad men, orze' par za' Dios kwa'n ñal kad men por kwa'n mile' bixa'.

⁶Rë go wech no bizan, nin kure' lo go, par tse'd go gak go nela da ga', no xmod nak Pol. Nin kure', nes par ni nale' go dimás lo rë kwa'n nzobni' lo ley che'n Dios. Per ni tu go kwa'n nak men che'n Jesukrist, nazit go más tsak go lo xtu rë wech go. ⁷No chi nizi go más tsak go xid más rë wech go, por rë che'n Dios kwa'n kinu go, per gat ñalt zi go sa', porke mis Dios mine'i. No chi lë' Dios mine'i, ¿chon nizi go marian? ¿Chi mis jwers che'n yub go, mile' kinu goi?

⁸Nile' go xigab, dox tsak go; mbaino dox rrik go nidi'zh go, no haxta nile' go xigab, nak go nela rey ga', gat naki'ntra' go no. Oj walika rey go, nes par nu no ngale' mandad kun go. ⁹Per na zak, rë no, xa' nak apost che'n Dios, Dios mizo no lugar lult lo rë men, nela tu men namás kimbëz par gat; mbaino niyitnu rë men yizhyuo no, no nixizhnu bixa' no; haxta nu rë ganj che'n Dios nine kwa'n nizak no. ¹⁰Nilu' no lo rë men nela men naxenla ga' por nilu' no widi'zh che'n Jesukrist; per go, xkix Jesukrist, kinu men go por natsin; mbaino no nak nela men yent jwers ga', per go, men kinu jwers por Krist ter nixizhnu men no, mbaino niyi' bixa' nine bixa' no, per go, más nzhon men ro'u. ¹¹Mbaino no, haxta nal se'gaka, nite'd no yalnila'n no yalnuzei', no ni xab no niyent, no gat ninet men no wen; mbaino ni gat kinu no plo yo no.

¹²Nikë no zhi'n kun ya' no, haxta plo ñazha no; no or nizhi'bde men no, orze' nina'b no lo Dios par ya men ze' wen; no ter nizakzi men no por nak no men che'n Jesukrist, per nixek no loi, wanei kwane. ¹³No or niye men no, orze' nikab no lo bixa' kun widi'zh wen; no kinu men no nela tu kwa'n yent kwa'n zu' ga', mbaino tu kwa'n wen namás par yubiy; dub tiemp nizak no se'.

¹⁴Gat kinita' kure' lo go lo yech re', par len tula go, sino ke par nen kunsej goi, porke rë go nak nela tu xmë'da kwa'n nazhi' da. ¹⁵Pwes ter kinu go chi' mil maestr xa' nilu' widi'zh che'n Jesukrist lo go, per nagakt gap go nayax xuz go ga'. Na nak xuz go, porke or midizha widi'zh che'n Jesukrist lo go, no ngwayila goi, orze' ngok go nela xmë'da ga'. ¹⁶Kuze', dox kina'ba lo go; gak go nela da. ¹⁷Por kure', mixëla Timoteo lo go, xa' nak nela tu xga'na, xa' nazhi' da, no xa' nzhon di'zh por Jesukrist. Lë'xa' ne lo go xmod nikizë'n lo widi'zh che'n Jesukrist, nela xmod nilu' ka widi'zh che'n Dios lo rë men che'n Me xa' nzhin rë plo ñan, ¹⁸porke nzho go kizi la dox tsak go, nile' go xigab, ya nayi'dtsi'tra' ma go, ¹⁹per nilen xigab yi'dtsi'n ma go lwegal, chi lë' Dios nzhaklai, orze' gat lë't nab ganen, xkwan nidi'zh rë xa' nizi dox tsak ba'i, sino ke wi'n nabej, chi walika nile' Sprit Nazhon che'n Dios, rë nak kwa'n nidi'zh bixa' nile' bixa', ²⁰porke tu men walika ñila widi'zh che'n Dios, gat nilut xa'i kun nab rë kwa'n nidi'zh xa', sino ke nilu' xa'i di xmod naban xa'. ²¹¿Xmod nzhakla go, yala lo go? ¿Chi nzhakla go yala, nzho tu bar ya'n par kina go?, o, ¿yala nazhi' da go, no dizha pura widi'zh wen lo go?

**Xmod ñal le' rë men che'n Jesukrist
or nzhak tu kwa'n gat lë' xid bixa'**

5 ¹Pwes nzhona, nidi'zh men xid go, rë xa' nak men che'n Jesukrist, ¡nzho tu go kinu mis xna' guya'n go, nak una' chego! No, ¡dox gat lë't kure', per ni xa' gat nilibe't Dios, gat nzhont met nile' kure'! ²¡Mbaino marian nizi gox! ¿Maxa go ngawin laxto' por kwa'n ngok re', no ngagotin go miyi' ba' xid go, xa' kwa'n mile' kwa'n gat lë' ba'? ³No ter gat nzota xid go, per sprit da nzo ka kun go, par ganin kwan ñal, xa' mile' kwa'n gat lë' ba'. ⁴Ter nzon zit, per nikë laxto'n go no nilen xigab che'n go; no or kwin go por nak go men che'n Señor

Jesukrist, bitsila go, lè' go kinu yalnazhon che'n Me par le' go mandad. ⁵Kuze', naki'n bichi go xa' nak sa' lo Mizhab, mbaino ter lo'x Mizhab kwerp che'n xa', per sprit che'n xa' ro' lo rë kwa'n nzhè'b xki xa', zhè kwa'n yubre Señor Jesukrist xtu wèlt.

⁶Gat ñalt zi go marian por kwa'n nile' go. No lè' go nane ka: Ke tlè' win tsa levadur nitsibech dub tu mas ro ko'b harin.

⁷Kuze', gat ñaltra' le' go kwa'n gat lè't xid go ni lo Dios, rë kwa'n nak nela levadur ga', nes par ya'n nambe go, nela tlè' ko'b harín, kwa'n laore mbich, par gaxao' pan sin levadur; porke walika go nak nela pan kwa'n gat nakxao't kun levadur kwa'n nzhao men lani Pask; no Krist ngut por kwent che'n be, nela nzhat tu mbëkxi'l ga' par lani Pask che'n rë men Israel.

⁸Kuze', naki'n le' be lani Pask kun pan kwa'n nzhakxao' sin levadur, kure' nak nambe laxto' be, no nali nikizë be, no nale't be lani Pask kun pan kwa'n nzho levadur go'x, kwa'n nak kwa'n gat lè', kwa'n nzho laxto' men.

⁹Lo xtu yech kwa'n mixëla lo go ze', nin: "Nach'èlt go dub laxto' go kun rë xa' niban kun cho la men", ¹⁰per gat kinita, nayot go xid rë men yizhyuo, xa' niban kun nayax men, o xid rë xa' kwa'n niwix gap dimi, o xid rë xa' wa'n, o xid rë xa' kwa'n nizuxib lo rë winab; pwes par nayo go xid rë men ba', naki'n ro' go lo yizhyuo tuli. ¹¹Kwa'n nzhaklan gon go lo yech re' nak: "Nach'èlt go kun rë xa' nidi'zh nak xa' tu men che'n Jesukrist, per niban xa' kun tu men, xtu men; o niwix xa' kwa'n kinu xtu men, o nizuxib xa' lo rë winab, o nak xa' tu men dox niye, o nak xa' tu men nguy, o wa'n xa'." Kun rë men nak sa', per ni nagao go kun lè' bixa'. ¹²⁻¹³Porke na, nagakta' len mandad lo rë xa' gat lè't men che'n Jesukrist, sino ke Dios ka wane le' yalgustis kun lè' bixa'. Per rë xa' ñila widi'zh che'n Jesukrist, go nak xa' le' yalgustis kun lè' bixa'. Kuze' nin lo go, naki'n kutin go xa' kwa'n nile' kwa'n gat lè' xid go ba'.

Or kinu rë men che'n Jesukrist tu kwent

6 ¹Or kinu go tu kwent kun tu wech go, men che'n Jesukrist, ¿chon ya go lo rë xa' gat lè't men che'n Jesukrist, par lè' xa' kuxkwa' kwent che'n go; chon naya go más wen lo rë men che'n Jesukrist? ²¿Chi nagont go, lè' zhè zhin, gab rë men che'n Jesukrist xmod gak kun rë men yizhyuo? No chi lè'i men che'n Jesukrist le' kuba' kun rë men

yizhyuo, orze', ¿kalo rē kwa'n win re', nagakt kuxkwa' yub tu rē go, rē kwent kwa'n nizak go? ³¿Chi nagat gon go, haxta nu lo rē ganj che'n Dios, gab go xmod gak kun lē' bixa'? No chi lē'i sa' nak, ipwes más jwals le' goi yizhyuo re'! ⁴Or nidil go kun mis wech go, men che'n Jesukrist, ¿chi ziye laxto' go, gab go lo rē xa' gat lē't men che'n Jesukrist, le' bixa' yalgustis kun go? ⁵Nin kure' lo go, nes par tula go. ¿Taxa niyent ni tu go, men che'n Jesukrist, xa' nzhak mbaino xa' natsin, par lē' xa' kuxkwa' kwent kwa'n kinu go kun wech go, men che'n Jesukrist? ⁶No gat lē't nab nidil tu go kun xtu goi, sino ke ñazob go demand wech go lo rē xa' nak zhi'n, xa' gat lē't men che'n Jesukrist.

⁷Kun nab tsa nidil go namás kun xtu rē men che'n Jesukrist, dox tu jwalt ro kure'. Más wen bixek go lo rē kwa'n gat lē' nile' bixa' lo go, no ter bila' go ka' xa' rē che'n go. ⁸Per go, kun mis men che'n Jesukrist, nile' go kwa'n gat lē', nakap go lo bixa', mbaino nilat go che'n bixa'. ⁹Nala't go wei' xigab gat lē't go par le' go kwa'n gat lē'. ¿Chi nagont go, nayot ni tu rē men, xa' nile' kwa'n gat lē', plo nile' Dios mandad? Rē xa' kwa'n niban kun tu men no xtu men, no rē xa' nizuxib lo rē winab, mbaino rē xa' niban kun tsa' men, mbaino rē miyi' xa' ño laxto' gak una', no rē miyi' xa' nika' tsa' miyi'; ¹⁰no ni rē men wa'n, mbaino ni rē xa' niwix ka' che'n xtu men, no ni rē men nguy, no ni rē xa' dox niye, no ni rē xa' nikide par lat xa' che'n men; pwes ni tu rē men re' nayot plo nile' Dios mandad. ¹¹No pla go ngok sa', per nal, lē' Dios mitsumbe la go, no mia'n nambe laxto' go lo Dios, porke miche' Dios rē kwa'n nzē'b xki go por Señor Jesukrist, no por Sprit che'n Dios.

Kwerp che'n be nak yado' che'n Dios

¹²Nzho men nidi'zh kure': “Na gak le rē kwa'n nzhaklan.” Walikai, per gat lē't rē kwa'n nzhaklan len, rēi wen. Kuzel' nalata le' ni tu kwa'n mandad lon. ¹³No nzho men nidi'zh: “Lē' kwa'n nzhao men nizu' par laxto' men, no laxto' men nizu' par nzhao men.” Walikai, per zhin zhē, rop kure' lox lo Dios. Per kwerp che'n be gat kinut bei par ban be kun tu men no xtu men, sino ke za' be kwerp che'n be par le' be kwa'n nzhakla Dios, porke kwerp che'n be nak che'n Dios. ¹⁴Pwes nela mile' Dios, nguruban Jesukrist, nu ska be le' Dios ruban

be. ¹⁵Pwes go, ¿chi nanet go, lë' kwerp che'n go nak kwerp che'n Jesukrist?, no chi lë' kwerp che'n be nak kwerp che'n Krist, orze', ¿chi ziza' be kwerp che'n Krist par gake tutsa kun kwerp che'n tu una' le'n kai (kwa' gal)? ¡Nayot gakla Dios kuba! ¹⁶¿Chi nanet go, or nika' tu miyi' tu una' kai, orze' rop xa' nzhak tutsa kwerp?, porke se' nzobni' lo Yech che'n Dios: “Rop xa' nak nela tutsa men.” ¹⁷Per tu xa' nak men che'n Jesukrist, tutsa ngok kwerp che'n xa' kun kwerp che'n Dios, por Sprit che'n Dios. ¹⁸Kuze', ¡yubchi go tuli, nabant go kun men, xa' gat lë't tsa' go! Rë nak xtu kwa'n gat lë' kwa'n nile' men, gat lë't lale kun kure', porke dox gat nambet ña'n kwerp che'n xa' kwa'n nile' kure' lo Dios, xa' niban kun chola men. ¹⁹¿Chi nanet go, lë' mis kwerp che'n go nak yado' che'n Sprit che'n Dios, no Dios mine' Sprit che'n Dios nzho laxto' go? Kuze', gat lë't mis go nile' mandad go, ²⁰porke nguzi' Dios go kun tu kwa'n dox tsak; kuze' naki'n za' be kwerp che'n be par Dios, le' be kwa'n nzhakla Dios.

Tu kunsej par kwa'n men tsa' men

7 ¹Nal ganin lo go, kwa'n ngunabdi'zh go lon, lo yech kwa'n mixë'l go or ne go: “Chi zak más wen nakwa'nt men una'.” ²Per por rriez ban men tu men xtu men, más wen kad miyi' gap tu una' xa' gak tsa' xa', no kad una' gap tu miyi' xa' gak tsa' una'. ³No kad miyi' mbaino kad una' naki'n nab tsa kun tsa' bixa' ga' bixa', ⁴porke rë una' kwa'n nzhap miyi', gakta' le' una' mandad kwerp che'n una', sino ke xmiyi' una' nile' mandad kwerp che'n una'; mbaino se'ga' miyi', una' che'n xa' nile' mandad kwerp che'n miyi'. ⁵Kuze', nakat go kwerp che'n go lo tsa' go. Más wen, ya'n go di'zh or na'b go tu kwa'n lo Dios, naga't go; dispwes orze' gaka ga' go kun tsa' go xtu wëlt, nes par nakide Mizhab go, le' go tu kwa'n gat lë', or naxek go lo kwa'n na'b kwerp che'n go. ⁶Nin kure' lo go, nela tu kunsej ga', gat lë't mandad che'n Diose. ⁷Na nzhakla, ¡más wen rë go ngak nab nela da ga'!; per por kad men, nile' Dios, xa' nak tu xa', no xa' nak xtu xa'.

⁸Per xigab da, rë xa' nab, mbaino rë una' kwa'n ngut xmiyi', más wen ya'n bixa' nab nela na ga', nakwa'nt bixa' men gak tsa' bixa'. ⁹Per chi nagak ka'n bixa' lo xigab re', pwes neka kwa'n bixa' tsa' bixa', porke más wen, kad men

gap tsa', ke par lox men lo kwa'n dox nzhakla men, kwa'n men tsa' men.

¹⁰Per lo nabtsa rë xa' kinu tsa', gadizha kure': Gat lë't xigab dai, sino ke Dios kile' mandade: Rë una' kwa'n nzhap xmiyi', nalë't xa' kun xmiyi' xa'. ¹¹No nal, chi lë' tu una' la' xmiyi', orze' ñal, ya nakwa'ntra' una' xtu miyi', o di nuev, zhë'l xa' kun xmiyi' xa', yo wen laxto' bixa' xtu wëlt, mbaino se'ska, nagakt lë' tu miyi' kun una' che'n xa'.

¹²Mbaino lo más rë go ganin, gat lë't Señor mile' mandade, xigab dai. Chi tu una' che'n tu miyi', xa' nak men che'n Jesukrist, gat ñilat una' widi'zh che'n Dios, per kinu una' xigab, lë' una' ban ka kun lë' miyi', kuze' gat ñalt la' miyi' re' una' che'n xa'. ¹³Mbaino se'ga', chi tu una' xa' ñila widi'zh che'n Jesukrist, no xmiyi' xa' gat ñilate, per xigab che'n miyi', lë' miyi' ban ka kun lë' una', orze' gat ñalt lë' una' kun xmiyi' una', ¹⁴porke miyi' xa' gat lë' men che'n Jesukrist re', ngok nambe xa' lo Dios por mizhë'l xa' kun una' xa' ñila widi'zh che'n Jesukrist; mbaino una' xa' gat lë't men che'n Jesukrist, nu una' ngok nambe lo Dios namás por xmiyi' una', xa' nak men che'n Jesukrist. Mbaino haxta rë xmë'd bixa', niwi' Dios lo nela lo men che'n Jesukrist, no nawi't Dios lo bimë'd nela tu kwa'n gat nambe ga' par lo Dios. ¹⁵Per chi kwalesquier tu rë xa' re', xa' miyi'y o xa' una'i, xa' kwa'n gat lë't men che'n Jesukrist re', gakla xa' lë' xa' kun tsa' xa', xa' nak men che'n Jesukrist re', pwes zak le' xa'i. Orze' lë' miyi' o una', xa' nak men che'n Jesukrist re', orze' gak lë' bixa', porke Dios ngurezh be par ban be chul, no zi be chul. ¹⁶No lu, una', kwa'n nak men che'n Jesukrist, pas por lu nzho rriez, lë' xmiyi'l ban par dubta' kun Dios; o, lu miyi', xa' nak men che'n Jesukrist, pas por lu namás, lë' una' che'nal ban par dubta' kun Dios.

¹⁷Widi'zh re' nzhaklan nin, par gon rë goi, go xa' nak men che'n Jesukrist: Nela xmod nzo go or ngwayila go Dios, sa' guzo go dubta'. Kure' nilun lo más rë men che'n Jesukrist xa' nzhin rë plo. ¹⁸Chi ngurezh Dios tu miyi' par gak xa' tu men che'n Jesukrist, dub nikë señ kwa'n lë circuncisión kwerp che'n xa', pwes gat ñalt kubchi xa' señ ze' kwerp che'n xa'; mbaino chi ngurezh Dios tu miyi' par gak xa' tu men che'n Jesukrist, dub gat nikët señ re' kwerp che'n xa', pwes gat ñalt kë señ re' kwerp che'n xa'. ¹⁹Porke yent kwa'n tsak, nikë señ

re' kwerp che'n men, o gat nikëte; kwa'n más tsak lo Dios nak, gon men ro' Dios. ²⁰Kad men ñal gak nela xmod nak bixa' or ngwayila bixa' Dios. ²¹Chi nakal tu mos nado lo xtu men por nguzi' xa' lu, or ngwayilal Dios; nale'tal be's xigab por lë'i; per chi gak zhirel dimi kwa'n nguzi' xa' ze' lu, par nale'ra' xa' mandadal, pwes bizhirei. ²²Pwes xa' nak mos nado lo xtu men, or ngwayila xa' Dios, par kë xa' zhi'n nazhon che'n Dios, nal gat naktra' xa' mos nado; yent kwan ka xa' par lo Dios; no se'ska, xa' yent cho nile' mandad or ngwayila xa' Dios, nal lë' xa' nak nela tu mos nado ga' lo Jesukrist. ²³Nguzi' Jesukrist rë go kun mis ren che'n Me. Kuze' nala't go gak go chigab nela tu mos nado ga' lo xtu men, sino ke nak go chigab nela mos nado ga' lo Jesukrist. ²⁴Pwes rë go wech no bizan, gok go dubta' dike xmod nak go, or ngwayila go Dios, par gak go men che'n Jesukrist.

²⁵No nal, gat kinuta ni tu widi'zh kwa'n ne Jesukrist por rë xa' nab, xa' laore kwa'n tsa'. Na gani tu widi'zh kwa'n nak xigab da par go, por nak da tu men che'n Jesukrist, por milats laxto' Dios da. ²⁶Nilen xigab, por rë tiemp nazhe'b kwa'n nzho nalre', más wen ya'n go nela xmod nzo go nal. ²⁷Chi kinul una', nala'tal una' che'nal; per chi gat kinul una', mejor nakwa'ntal una'. ²⁸Per chi kwa'nal una', gat nayi'te par lo Dios; mbaino chi lë' tu una' xi kwa'n miyi', gat nayi't skai par lo Dios; per tu kwa'n ganin, rë xa' kwa'n nzhap tsa', dox kwa'n ne bixa' por kuba', no na, gat nzhaklata ded go lo rë kuba'. ²⁹Rë go wech no bizan, kure' kwa'n nzhaklan nin lo go: Che'ptsa tiemp kinu be, ban be yizhyuo re', kuze' rë miyi' xa' kinu una', ñal bile' go xigab nela xa' nangayot ngap una'. ³⁰No rë go xa' nizak yalnawin nalre', nale't go be's xigab por kwa'n nizak go; mbaino rë go xa' nzho chul nalre', nazit go marian por kuba'. No rë go xa' nizi' kwa'n, nazit go marian por kuba'. ³¹No rë go xa' kinu rë kwa'n par nikë go zhi'n kun lë'i, goknu go rë men naki'ne, porke yizhyuo re', lë'i lox, kun rë kwa'n nzhin loi.

³²Na gat nzhaklata le' go be's xigab, porke tu miyi' nab kwa'n gat kinut una', nile' xa' xigab por zhi'n nazhon che'n Dios, mbaino xmod par ya'n xa' wen lo Dios. ³³Per xa' kinu una', más nile' xa' xigab por kwa'n nzho yizhyuo re', no xmod par ya'n xa' wen kun una' che'n xa'. ³⁴No se'ska, rë una' nab

kun rë una' nzhap miyi', porke rë una' nab más nile' bixa' xigab xmod le' bixa' rë che'n Dios, par gak bixa' nab tsa par Dios; no se'ska nak rë una' ye'n kun Dios. Per rë una' kwa'n nzhap miyi' más nile' bixa' xigab por rë kwa'n nzho yizhyuo re', no xmod ya'n bixa' wen kun xmiyi' bixa'. ³⁵Nin kure' lo go par bien che'n goi, no gat lë't par len gat lë' vid che'n goi, sino ke par ban go dike xmod nzhakla Dios, mbaino par chizhi' go Dios más ke lo rë kwa'n.

³⁶Per chi nzho tu miyi' nile' xigab, gat went dox kilë' xa' par ban xa' kun una' kwa'n nidi'zhnu xa', mbaino por una'ro la una', per mia'n bixa' di'zh ban bixa', pues ñal ban bixa', porke nayi'y kide xa' una'. ³⁷Per chi nzho tu miyi', nile' xigab, gat naki'nt ban xa' kun una' nidi'zhnu xa', porke Dios nile', nzhak nika'n xa' lo kwa'n nzhakla kwerp che'n xa', pues gak ya'n nab xa', porke gat nayi'te par lo Dios. ³⁸Mbaino xa' ban kun una' nidi'zhnu xa', pwes wen ka kwa'n nile' xa'; per xa' nakwa'n una', más wene par xa' re'.

³⁹Tu una' xa' kinu miyi', naki'n ban xa' kun tsa' xa' haxta zhë gat miyi', orze' gak kwa'n una' xtu miyi', namás lë' miyi' ze' naki'n gak tu xa' ñila widi'zh che'n Dios. ⁴⁰Per par xigab da, más wen ya una' kun Dios chi nakwa'n ra' xa' miyi'. Wayila go kwa'n nin, porke mis Sprit che'n Dios kwa'n kinu go, kinun.

Niza' men gon lo winab kun kwa'n nzhao bixa'

8 ¹No nal, nin lo go, or niza' men gon lo rë winab por kwa'n nzhao men. Rë be nane che'p kure', per or nile' tu men xigab, dox nzhak xa' tu kwa'n, orze' ño yalmarian laxto' xa'. Per más tsak, or nazhi' men wech men, no kure' nizu'i par más niro'b men lo rë kwa'n nak che'n Dios. ²No chi nzho tu xa' nidi'zh, dox nane xa' rë kwa'n, per stubi nagat tse'd xa' nela xmod ñal gak xa', ³per xa' nazhi' Dios, orze' Dios nilibe' men ze'.

⁴Mbaino por rë kwa'n niza' men gon lo rë winab kun kwa'n nzhao men, no chi nayi' gao men che'n Jesukriste, rë be nane, yent kwa'n tsak tu winab yizhyuo re', porke tutsa Dios nzho. ⁵Pwes nayax men nidi'zh, nzho nayax dios lo yibë', o lo yizhyuo; no nu nidi'zh men, rë winab re', dios che'n bixa'i, ⁶per par be, nzho tutsa Dios, Me nak Xuz be, Me mile' rë

kwa'n nzho; no por lè' Me, kinu be yalnaban. Mbaino nzho tutsa Señor Jesukrist, no por Jesukrist, mizuxkwa' Dios rē kwa'n, no por lè' Me kinu be yalnaban.

⁷Per gat lè't rē men che'n Jesukrist nane rē kure', porke nzho bixa' ya miè' la nizuxib lo rē winab, no or nzhao bixa' rē kwa'n niza' men lo rē winab re', orze' nizi bixa', nzè'b xki bixa' lo Dios, porke stubi nile' bixa' xigab, che'n rē winab re'.
⁸Per gat lè't por kwa'n gao be, le' wi' Dios lo be más wen; o le'i, wi' Dios lo be gat lè'.

⁹No ter nanel, nzhak nzhaowal rē kwa'n, per biwi' namás, napa nu xtu men le'i, tu xa' laore ngwayila Dios, orze' zi xa', nzè'b xki xa' lo Dios por kure', por lu namás. ¹⁰No chi lu, xa' nane rē kure', no zabal gawal plo kwa'n niza' men gon lo rē winab kun kwa'n nzhao men, mbaino ne tu men che'n Jesukrist kile'l kure', tu xa' laore ngwayila Dios, orze' nu xa' ye laxto' le'i. ¹¹No ter nanekal gat nayi'te, per por lu namás, wechal xa' gat ñilat be's Jesukrist, zi xa' nzè'b xki xa' por ndao xa'i, orze' nayilatra' xa' Jesukrist, Me ngut por lè' xa' lo krus. ¹²No por mile'l kure', no mizi xa', nzè'b xki xa' lo Dios por ndao xa' lo mis kwa'n une xa' ndaowal, kuze' mis lu nzè'b xki lo Jesukrist por kwa'n ndawal ba'. ¹³Kuze', na, chi por tu kwa'n gau le' gap tu men che'n Jesukrist dol lo Dios, más wen nayot gau kwa'n niza' men gon lo rē winab, chi por kure' le' gap xa' re' dol lo Dios.

Cho pa' direch kinu tu apost

9 ¹Biwi'ux, nase yent cho gak ki'l da par jwers len tu kwa'n ne go. ¿Chi ze't laxto' go na nak tu apost, mbaino unen Señor Jesús? ¿Chi nu mia'l la laxto' go, galo laka na midizh widi'zh che'n Jesukrist lo go? ²No ter xtu rē men gat nanet bixa' chi na nak tu apost, per go nane kai, por na midizh widi'zh che'n Jesukrist lo go, orze' ngwayila goi.

³Kure' nak kwa'n nin, par rē xa' gat ñilat chi walika, nak da tu apost. ⁴No, ¿chi nu mia'l laxto' go, go ñal ne' rē kwa'n gao no mbaino kwa'n go no? ⁵Mbaino, ¿chi nu mia'l laxto' go, no gak ban kun tu rē una' xa' nak men che'n Jesukrist par gak tsa' no, no le' kumpañ no plo ya no, nela xmod naban ka más rē apost? No nela xmod mile' ka, rē wech Señor Jesukrist, no haxta nu Per mile' se'. ⁶O, ¿taxa yub no naki'n kë no zhi'n par

gao no, na no Bernabé, orze' lè' go gat ñalt, ne' go kwa'n gao no, dub nikè no zhi'n nazhon che'n Dios xid go?

⁷O, ¿cho tu go nak sondad, no gat nzhaxt nika' go? O, ¿cho tu go kinu ya gub, orze' chi nagakt gao go xlè che'ne? O, ¿chi kinu go tu bak, orze' chi nagakt go go nizh che'n ma? ⁸No nagabt go nal, xigab yeka nin rè kure' lo go, sino ke lo ley kwa'n mila' Dios lo Muisés nzobni' kure', ⁹porke se' nzobni' lo ley: “Nakotal yex xi' ngo'n or nigo' ma triu.” Pwes rè widi'zh re', nangadi'xt Diose namás por dox nile' Dios xigab por rè ma, ¹⁰sino ke Dios midizhe par be. Lè' ley re' nkè lo yech por be, porke xa' nzha'n yuo, no xa' nitsumbe triu, rop bixa' nizak laxto', dub kimbèz bixa', gal bixa' kwa'n le' bixa' gan lo yalgo'n. ¹¹Lè' go nak nela tlè' yuo plo ngo'n no lazh kwa'n nak che'n Dios, por milu' no widi'zh che'n Dios lo go. Kuze', nela tu kwa'n nile' no gan ga', por zhi'n kwa'n nikè no, ñal ne' go kwa'n naki'n no par ban no. ¹²No chi ñal gaknu go xtu men por kwa'n mile' bixa' xid go, pwes no, más ñal gaknu go no.

Per gat kina'bt no kure' lo go par nazo no zhi'n lo go, kuze' nixek no lo rè kwa'n nizak no, por nilu' no widi'zh che'n Dios. ¹³No lè'go nane ka, rè xa' nile' zhi'n che'n yado' che'n men Israel, nzhak nzhao bixa' bè'l che'n rè ma kwa'n niza' más rè men par gon, no se'ga' rè xa' nile' zhi'n lo biko' che'n yado' ze', nzhak nzhao bixa' bè'l che'n rè ma kwa'n nixo'b lo biko'. ¹⁴No se'ga' mile' Señor Jesukrist mandad, lo mis ka rè men che'n Dios za' kwa'n naki'n rè xa' kwa'n nidi'zh widi'zh nazhon che'n Dios por Jesukrist, par ban bixa'.

¹⁵Per na, ni tu rè kure' gat kileta', no ni gat kizo'bai lo yech par le' go se' kuda; más wen gat da ke par le' tu men nazakra' laxto'n por zhi'n kwa'n nilen, ka nidizha widi'zh che'n Dios. ¹⁶No or nidizha widi'zh nazhon che'n Dios por Jesukrist, gat nizat da marian, porke se' naki'n len, mile' Dios mandad. No chi nalene, ¿zhe'b nalats kwa'n zaka! ¹⁷Mbaino chi lè'da lu widi'zh che'n Dios, nizak laka laxto'n, lè' Dios kix tu kwa'n wen kan; no chi lè'da lei jwers, pwes naki'n len kwa'n mile' Dios mandad len. ¹⁸Orze', ¿kwan gax kan por ka nilun widi'zh nazhon che'n Dios lo rè men? Kwa'n nzhax kan nak dox nizak laxto'n, por ka nidizha widi'zh che'n Dios, ter ñal gax kan por zhi'n re'.

¹⁹No ter niyent cho nile' mandad da, per nizi da nela tu mos nado ga' lo rè men. Sa' nilen par más men yila Jesukrist.

²⁰Or nzon xid rë men Israel, nilen nela xmod nak bixa', porke ley kwa'n mila' Dios lo Muisés, ñila bixa'. No par len gan, gak bixa' men che'n Jesukrist, nilen chigab nu da ñila ley kwa'n mila' Dios lo Muisés, nela xmod ñila bixa'i, no ter gat naki'ntra' gona ley re'. ²¹No xid rë xa' kwa'n gat kinut ley kwa'n mila' Dios lo Muisés, nilen, nzhak da nela tu men, xa' gat kinut ley ga', no ter nzhona ro' Dios por nilen rë ley che'n Krist, per sa' nilen par len gan rë xa', gat kinut ley. ²²No or nzon xid rë xa' che'ptsa nzhak widi'zh che'n Dios, nilen nela lë' bixa' ga'; se' nilen kwaliskier mod par nu bixa' ban par dubta' kun Dios. ²³Rë kure' nilen por widi'zh nazhon che'n Dios kwa'n milu' Jesukrist, par tutsa junt ne' Dios kwa'n nazhon kwa'n mila' Dios di'zh ka' be.

²⁴Naya'lt laxto' go, or nigo' men karré par le' bixa' gan tu kwa'n, rë bixa' nikë' karré, per tutsa xa' nile' gan. Se'ska go, gok go nela xa' mile' gan, nes par ne' Dios kwa'n nazhon kwa'n mila' Dios di'zh ka' go.

²⁵No nu bitsila go, rë xa' niyit por tu kwa'n, dox nitse'd bixa' kwerp che'n bixa' par xek bixa'. Kure' nile' bixa' par le' bixa' gan tu kwa'n lweg'a' nilox, per be xa' nzho nez che'n Dios, nak be nela xa' niyit ga', par le' be gan, ne' Dios yalnaban ka' be, kwa'n nayot lox. ²⁶Kuze', gat nakt da nela tu men nikë' karré nadi'blo ga', xa' gat nile't gan, zhin plo nzhakla; no ni gat nakt da nela tu men kitse'd dil, no nale't gan tsen tu puñet; ²⁷per na nizakzi kwerp da, no gat nileta kwa'n nzhaklai, nes par yo kwent milun widi'zh che'n Dios lo más rë men, no par nagakt da xa' niyent kwan ngazu' lo kwa'n mile'.

Lë' rë men Israel nzë'b xki lo Dios

10 ¹Rë go wech no bizan, gat nzhaklata ya'l laxto' go kwa'n nguzak rë xuz be xa' nzhala; mitsao' Dios bixa' le'n tu xkao, no nded bixa' le'n nitsdo' Naxne. ²No por nded bixa' le'n xkao ze', mbaino por nded bixa' le'n nitsdo' Naxne, mile' ngoklëi' bixa' par ngwakë bixa' tich Muisés. ³No se'ska, rë bixa' ndao tutsa kwa'n mila Dios dizde lo yibë'. ⁴No se'ska, rë bixa' ngu' tutsa kwa'n miza' Dios, porke ngu' bixa' nits kwa'n ngulen ta' ke ro, mbaino ke ro re' nak Krist, no lo mis lë'ska Me kwa'n mile' kumpa'ñ bixa' plo nkizë bixa'. ⁵No ter rë

bixa' une kwa'n wen mile' Dios par lè' bixa', per platsa bixa' mile' kwa'n nangayot laxto' Dios, kuze' nayax bixa' zhaga' nguzhin bixa' le'n yuo bizh, plo ngut bixa'.

⁶Rè kure' nak nela tu kunsej ga' par be, par nawixt be rè kwa'n miwix bixa'. ⁷No ni nazuxib be lo rè winab, nela xmod mile' pla bixa', porke se' nzobni' lo Yech che'n Dios: "Rè men nguzublo ndao, no ngu' bixa', orze' nguzublo mile' bixa' kwa'n ño laxto' bixa', no nguzen bixa' tu una' no xtu una'." ⁸No nagakt ban be kun tu men xtu men, nela xmod mile' pla bixa', pwes por kure' tutsa zhè ngut gal bichon mil bixa'. ⁹¿Chi nile' go xigab, nazakzit Krist go, ter zilita' naban go lo kwa'n gat lè'? Por miban pla bixa' sa', orze' ndao mbè'l nayi' bixa', nayax bixa' ngut. ¹⁰No ni nadi'zh be kwa'n gat lè' tich Dios, nela xmod mile' pla bixa', kuze' mixè'l Dios ganj che'n Dios par mbit nayax bixa'.

¹¹Rè kure' nguzak rè xuz be, xa' nzhala; kuze' nkèi lo Yech che'n Dios, nela tu kunsej ga' par wi' be kwan le' be, be kwa'n naban lult rè tiemp re', par nale' be nela xmod mile' bixa'. ¹²Kuze', kwaliskier xa' kwa'n nile' xigab, wen nzo xa' lo Dios, pwes naki'n wi' xa', napa galo laka xa' le' kwa'n gat lè'. ¹³Pwes yent cho tu kwa'n naxek be le' be or nizenbe' Dios be (niwi' Dios xmod nak be), porke rè kwa'n nizak be, rè men nizake. Mbaino naki'n wayila go, lè' Dios nile' rè kwa'n mila' Me di'zh, porke nala't Dios zakzi go haxta plo nagakra'i, sino ke lè' Me gaknu go par xek go ded go loi.

**Rè lani che'n rè winab no lult yè'l
kwa'n ndao Señor Jesukrist**

¹⁴Kuze' nin lo rè go wech no bizan, rè xa' nazhi' da, nazuxibt go lo rè winab; guro' go tuli lo rè kure', ¹⁵porke nane ka, pas lè' go zobyek ka kwa'n nin, no bile' go xigab, walika kwa'n kidizha lo go. ¹⁶Or nzho be vin nazhon tutsa le'n tutsa vas, kure' nile' nitsila be lult yè'l kwa'n ndao Señor Jesukrist, no niza' be xkix lo Dios por lè'i, par tsila be, lè' ren che'n Jesukrist mixo por be, or ngut Me lo krus. No nu or nichix be tutsa pan no nzhao be tlè' ga'i, kure' nile', nitsila be, tutsa kwerp nak be kun Jesukrist, Me unkè lo krus por be. ¹⁷Ter dox nayax be, per tutsa kwerp nak be por nzhao be tutsa pan.

¹⁸Biwi' go xmod nile' rē men Israel: Nzhao bixa' bë'l che'n rē ma kwa'n nzhut bixa' lo biko' le'n yado', par Dios. Pwes rē men re', tutsa nak bixa' lo Dios por gon kwa'n miza' bixa' lo Dios. ¹⁹Gat lē't por nin kure' gab go: “Walika tsak rē winab kwa'n ñila xtu ben rē men”, o gab go: “Más tsak rē kwa'n nzhao bixa' re', kwa'n niza' bixa' gon lo rē winab, ke lo wanei xtu rē kwa'n nzhao men.” ²⁰Nin kure' por rē men xa' gat nilibe't Dios, porke rē kwa'n niza' bixa' gon lo rē winab, per gat lē't lo winab niza' bixa'i, sino ke par Mizhab niza' bixa'i, no gat nzhaklata' gak go lal kun rē xa' niza' gon par Mizhab, ²¹porke chi go go vin le'n vas che'n Señor Jesukrist, orze' nagakt go go kwa'n nzho le'n cop kwa'n niza' bixa' lo Mizhab; no chi gao go lo mes che'n Señor, orze' nagakt gao go lo mes che'n Mizhab, ²²o, ¿chi nile' go xigab, nazakzit Krist go, ter zilita' naban go lo kwa'n gat lē'? O, ¿kwan gab go, más nazhon go lo Dios?

**Ñal le' rē men che'n Dios kwa'n wen par
nadi'zh más rē men gat lē' por Dios**

²³Walika, gak le' be rē kwa'n nzhakla be, per gat lē't rē kwa'n nzhakla be zu' par be, porke gat lē't rē kwa'n nzhakla be zu' tsiro'b be lo rē che'n Jesukrist. ²⁴No nale't go xigab namás par bien che'n nab go, sino ke bile' go xigab nu par bien che'n más rē wech go, men che'n Jesukrist. ²⁵Gak gao go kwaliskier bë'l kwa'n nido lo xbi', no ni nale' go xigab plo nzēi, par yent kwan zi go or gao goi, ²⁶porke lo Yech che'n Dios, se' nzobni': “Yizhyuo, mbaino rē kwa'n nzhin loi, che'n Dios rēi.” ²⁷Per chi tu xa' gat ñila widi'zh che'n Dios, no kwezh xa' go par gao go tu kwa'n lizh xa', no nzhakla go ya go lizh xa', pwes dao go rē kwa'n ne' xa' gao go, sin nale' go xigab, chi zak gao goi o nagakte, nes par niyent kwan zi go por lē'i. ²⁸Per chi ne tu men lo go: “Lē' bë'l re' miza' men gon lo rē winab”, pwes nagaot goi, por xa' ne kure' lo go, par niyent kwan zi xa' por kwa'n gao go re', porke che'n Dios yizhyuo, no rē kwa'n nzhin loi. ²⁹Kure' nin par niyent kwan zi xtu men lo Dios por kwa'n nile'l, no gat lē't par niyen kwan zile. Pas nzho go kile' xigab se': “¿Chon naki'n len xigab par nazi xtu men nakap por kwa'n nilen? ³⁰Or nizan xkix lo Dios por kwa'n nzhau, orze' yent kwan nayi' gau, kuze' gat ñalt di'zh xtu men ticha, nayi' gau tu kwa'n.”

³¹Per na ni, or gao go o go go kwaliskier tu kwa'n, u or le' go wanei cho xtu kwa'n, per bile' goi nela xmod ñal ka, nes par wi' men, lè' Dios walika nazhon. ³²Kuze', biwi'u par niyent cho zi nakap por kwa'n nile' go, ni nazi rë men Israel nakap, mbaino ni rë men gat lè't men Israel zi gat lè', no ni rë xa' nak men che'n Jesukrist, yent kwan zi por go, ³³porke na nile ña'n da wen kun rë men; rë plo gat nikwanta' kwa'n zu' par da namás, sino ke nikwana kwa'n zu' par más rë men, nes par nu bixa' ro' lo rë kwa'n nzè'b xki bixa' lo Dios.

11 ¹Bile' go nela na ga', porke na nile kwa'n nzhakla Jesukrist.

Xmod ñal le' men che'n Jesukrist or nzhak kult

²Rë go wech no bizan, nizak laxto'n por go, porke zilita' nitsila go da, no nile' go rë kwa'n milun lo go, ³per nzhaklan ne go, lè' Krist nile' mandad kad miyi', no lè' miyi' nak xa' nile' mandad lo una' che'n xa', mbaino lè' Dios nile' mandad lo Krist. ⁴Kuze', rë miyi', chi dub nzob kwa'n yek xa' or na'b xa' tu kwa'n lo Dios, u or di'zh xa' tu kwa'n gab Dios lo xa', orze' mal mia'n xa', tu lad mila' xa' Krist. ⁵No kwaliskier tu una', or na'b xa' tu kwa'n lo Dios, u or di'zh xa' tu kwa'n gab Dios lo xa', no yent kwan xo'b yek una', orze' tu lad mila' xa' xmiyi' xa', no nak una' nela tu una' mizhi'b yek ga' por gat nzhon una' ro' xmiyi' una'. ⁶No chi lè' tu una' gat nzhakla yao' yek una', pwes más wen zhi'b yek una' tuli; no chi nitula una' zhi'b yek una', pwes neka sao' una' yek una', orze', ⁷porke miyi', por nakxao' xa' nela Dios ga', kuze' por lè' xa' nilu' lè' Dios nazhon; no por nguro' una' ta' miyi', kuze' lè' una' nizu' par nilu', lè' miyi' dox tsak; kuze' ñal yao' yek rë una', ⁸porke gat lè'ta' kwerp che'n una' nzè miyi', sino ke kwerp che'n miyi' nzè una'. ⁹No ni nangago Dios miyi' por una', sino ke ngulo Dios una' por miyi'. ¹⁰Kuze', naki'n yao' yek tu una' le'n yado' par ne rë ganj che'n Dios, lè' una' nzhon ro' xmiyi', ¹¹per por nak be tutsa kun Jesukrist, nagakt ban miyi' sin una', no ni una' nagakt ban sin miyi'. ¹²Pwes walika, lè' una' nguro' ta' miyi', no nu ska miyi' nzhak por una', per rop bixa' nzè lo Dios, Me ngulo rë kwa'n.

¹³Ñal ne go, naki'n xo'b tu kwa'n yek rë xa' una', or na'b xa' lo Dios. ¹⁴No men miyi', nane be, dox gat lè't lu' xa' chi

lè' xa' la' ro'b yichyek xa'. ¹⁵Per par una', dox chule par lè' xa', no'l yichyek xa'; kuze', mila' Dios no'l yichyek una', par tsao'we yek xa'. ¹⁶No chi tu men nzhakla chë'lro' kun no por kure', ñal ne xa', ni no, mbaino ni más rë xa' nak men che'n Jesukrist xa' nzhin kwaliskier xtu plo, gat nile't no kun yichyek no sa'.

**Gat ñalt kwa'n nile' bixa', or nibin bixa',
nile' bixa' Santa Cena che'n Señor**

¹⁷Nal dizha más kure' lo go, nagakt nin wen nzha go, por kwa'n kile' go re', porke or nibin go, lugar di le' go kwa'n wen, lè'la kwa'n gat lè' nile' go. ¹⁸Galo laka, kwa'n ganin lo go, nzhona nidi'zh men, or nibin go nile' go kult, gat nzhint go wen, no gat nakt go tutsa, no kure' ñila ka, pas wali kwa'n nidi'zh men. ¹⁹No walika, naki'n ka gak rë kure' xid go, nes par ne go, cho xa' walika nak men che'n Jesukrist. ²⁰Kuze', or nibin go lo mes par le' go kwa'n lè Santa Cena che'n Señor Jesukrist, gat nile't goi nela xmod ñalkai, ²¹porke or nile' goi, pla go nizhubner nzha go, jhaxta nizuzh go!, mbaino más go ña'n kun yalnila'n. ²²No chi lè' go niyentra' kwan nzhon, lizh go bile' rë kuba'. ¿Chon tu lad nila' go rë wech go, men che'n Jesukrist, no nile' go nitula rë xa' gat kinut kwa'n gao xid go? Kwan ganin lo go nal, dox wen kwa'n kile' go pas. Per gat kile't go kwa'n wen.

Santa Cena che'n Señor

(Mt. 26:26-29; Mr. 14:22-25; Lc. 22:14-20)

²³Milu' Señor Jesukrist lon dike xmod milun lo go, ke lè' Señor Jesús, or nguzen rë men Me yè'l kwa'n ndao Me lult, kun rë men che'n Me, or ngol lani Pask, orze' nguzen Me pan, ²⁴no or milox miza' Me xkix lo Dios, orze' michix Mei no nzhab Me: “Kure' nak kwerp da kwa'n nak tu gon lo Dios par bien che'n go; no kad wëlt, or gao go pan re', bitsila go da.” ²⁵No se'ska, or milox ndao bixa', orze' nguzen Me kwa'n nzho vin, no nzhab Me: “Kure' nak ren da, kwa'n milan di'zh xon par go. Se' bile' go rë wëlt go go kure', par tsila go da”, ²⁶porke rë wëlt, or gao go pan re', no go go vin re', kure' zu' par lu' go xmod ngut Jesukrist lo krus, haxta zhin zhë, or yi'd Me xtu wëlt.

Xmod ñal le' rë men che'n Jesukrist Santa Cena che'n Señor

²⁷Kuze' nin lo go, kwaliskier tu go xa' gao pan re', no go go kwa'n nzho le'n vas che'n Señor, no naga gon go, xmod nak kure', orze' nayi'y par go, no nak go nela xa' mbit Señor, or mixo Me ren che'n Me. ²⁸Kuze' kad go, biwi' go, chi nambe ka laxto' go lo Dios, mbaino chi niyent kwa'n kinu go kun ni tu men, or naga gao go pan re', no go go kwa'n nzho le'n vas re'. ²⁹Porke xa' gao kure', no go xa' kwa'n nzho le'n vas che'n Señor, sin nawi' xa' xmod nak laxto' xa', orze' mis lë' xa' le', zakzi Dios xa'. ³⁰Kuze', nayax go yent jwers, no nzho go nzhakne, mbaino nzho go ya ngut la. ³¹Per chi wi' be wena wen kwan pa' nak be lo Dios, orze' gat naki'nt rël Señor kwan nak be. ³²No ter rël Señor xmod nak be, kure' zu' par tse'd be, no par nazakzi Dios be junt kun rë men yizhyuo, or zakzi Dios bixa'.

³³Kuze', nin lo rë go wech no bizan, or kwin go par le' go Santa Cena che'n Señor, gulëz go, za rë go, par tutsa gao go no par tutsa le' goi. ³⁴No chi nila'n tu go, pwes lizh go dao go, par nagab Dios xmod gak kun kad go por gat nibin go nela xmod ñal ka. No or yi'dtsi'n ma go, orze' ganin lo go xmod gak más rë kwa'n.

Yalnazon kwa'n niza' Sprit che'n Dios

12 ¹Rë go wech no bizan, nzhaklan gon go xmod nak rë yalnazon kwa'n nine' Sprit che'n Dios ka' be. ²Rë go nitsila, or stubi nagat libe' go widi'zh che'n Jesukrist, nela tu men nikal lo ga', ngwakë go tich rë winab kwa'n ni nagak di'zh. ³Kuze', nzhaklan ne go, niyent cho gak zhi'bde Jesús por Sprit che'n Dios, no ni yent cho gak gab: “Jesukrist nak Señor da”, chi gat lë' por Sprit che'n Dios, Me kwa'n nzho laxto' xa'i.

⁴No nal, nzho nayax mod niza' Dios kwa'n le' kad men yado', per mis tutsa Sprit che'n Dios nile' rëi. ⁵No nzho nayax mod, nile' men zhi'n nazhon che'n Dios, per tutsa Dios nile' nzhak rë zhi'n re'. ⁶No nayax mod nirulo yalnazon che'n Me, per tutsa Dios nile' nzhak rë loi xid kad bixa'.

⁷Per lo kad men, xa' mod nirulo zhi'n nazhon che'n Sprit che'n Dios, par bien che'n rë men, ⁸porke por Sprit che'n Dios, nzho xa' dox nzhak nizobyeq rë kwa'n, mbaino nzho men, dox

nane xa' rē kwa'n por mis Sprit che'n Dios. ⁹Mbaino, por mis Sprit re', nzho men dox ñila widi'zh che'n Jesukrist, mbaino nzho xa' niliyak men nzhakne por mis Sprit ska re'. ¹⁰No nzho rē men nile' rē lo kwa'n nazhon, no nzho men nile' Sprit re' nidi'zh por Dios; mbaino nzho men ñanu laxto' cho sprit nzho laxto' tu men; chi Sprit che'n Diose o che'n Mizhabe; mbaino nzho men nzhak nidi'zh rē lo di'zh kwa'n gat nakbe't; no nzho ska men nile' Sprit re', gak gon bixa' kwan gab rē widi'zh re'. ¹¹Per rē zhi'n nazhon re' nile' mis tutsa Sprit, Me niza' zhi'n nazhon nela xmod nzhakla Me, par le' kad men.

Tutsa nak be kun kwerp che'n Jesukrist

¹²Kwerp che'n men, ter nayax part kinui, per tutsa kwerp nakxao'we; se'ta' nak kun kwerp che'n Krist kun rē men che'n Me, ¹³porke rē be ngoklëi' kun mis tutsa Sprit, par ngok be tutsa kwerp kun Krist, ter nak be men Israel, o men gat lë't men Israel; ter nzho be nak mos nado lo xtu men, o xa' yent cho nile' mandad; per mis tutsa Sprit che'n Dios nzho laxto' rē be, ¹⁴porke kwerp che'n be, gat nakxao'te kun tutsa kwa'n, sino nayax kwa'n nakxao'we. ¹⁵O, ¿chi zak gab ni' men: “Lë'da gat lë' ya' men, kuze' gat nakt da tu kwa'n che'n kwerp che'n men”? No, ¿chi por midi'zhe sa', kuze' nagaktra'i che'n kwerp che'n men? ¹⁶No chi lë' tu nzha men gab: “Lë'da gat lë' zalo men, kuze' gat nakt da tu kwa'n che'n kwerp che'n men.” No, ¿chi por kuze', nagaktra'i che'n kwerp che'n men? ¹⁷No chi dub kwerp che'n be nak zalo be, orze', yent nzha be par gon be tu kwa'n. Mbaino, chi dub kwerp che'n be nak nzha be, orze', ¿ma xi' be par gak zi be yi'd xla' tu kwa'n xi' be? ¹⁸Per Dios mizuxkwa' kad kwa'n kinu kwerp che'n men, nela xmod ngol la Me. ¹⁹No chi lë' rē part che'n kwerp che'n men ngake tutsa part, orze', ¿xmod ngake tu kwerp? ²⁰No ter dox nayax kwa'n nakxao' kwerp che'n men, per rēi nzē ta' tutsa kwerp.

²¹Nagakt gab zalo men lo ya' xa': “Gat naki'nt da lu”, no ni nagakt gab yek men lo ni' xa': “Gat naki'nt da lu”, ²²per rē kwa'n kinu kwerp che'n be, kwa'n chigab más che'p jwers kinu, kuze' kwa'n más naki'n be; ²³no rē part che'n kwerp che'n be, kwa'n zak be yent cho kwent be's, no kuze' kwa'n más nikina be; no se'ska nile' be kun rē kwa'n gat nilu't lo men, kuze' más nitsao' be. ²⁴No lë'la rē kwa'n che'n kwerp

che'n be, kwa'n gat naki'n sao' be, menes nikina bei, porke se'ka mizuxkwa' Dios kwerp che'n be par más kina be plo nile' be xigab, menes tsak. ²⁵Sa' nak kwerp che'n be, par nalë'i kun weche, sino ke nikinai weche. ²⁶No or ne tu plo be, dub kwerp che'n be nizinei; mbaino or ñak tu plo ne be, dub be ña'n wen.

²⁷No nal, se'ska kun be, rë be nak kwerp che'n Krist, no kad be nak tu part che'n kwerp che'n Me. ²⁸No nizo Dios men yado', par le' bixa' zhi'n xid rë men che'n Me; galo laka mizo Dios rë xa' nak apost, orze' rë profet, xa' nidi'zh por Dios; orze' rë xa' nilu' widi'zh che'n Dios lo men, mbaino xa' nile' rë lo zhi'n nazhon, no rë xa' niliyak men nzhakne, no rë xa' nzhaknu rë men, mbaino rë xa' nizo dilant, no rë xa' nzhak nidi'zh rë lo di'zh kwa'n niyent cho nane. ²⁹Per gat lë't rë bixa' nak apost, no ni gat lë' rë bixa' profet, xa' nidi'zh por Dios; mbaino ni gat lë' rë bixa' xa' nilu' widi'zh che'n Dios, o rë xa' kwa'n nzhak rë lo zhi'n nazhon. ³⁰No gat lë't rë bixa' niliyak men nzhakne, o xa' nidi'zh rë lo di'zh kwa'n niyent cho nane, mbaino ni gat lë' rë bixa' xa' nane kwan gab rë widi'zh gat nakbe't. ³¹Per go, ñal ka kwe go lo Dios tu rë zhi'n kwa'n más tsak re'. Per na lu' lo go, tu kwa'n más nazhon lo rë kure', par le' go.

Xmod nilu', walika nazhi' tu men, xtu men

13 ¹No chi na, nzhak nidizha rë lo di'zh kwa'n nidi'zh rë men yizhyuo, mbaino haxta nidizha rë di'zh che'n rë ganj che'n Dios, per chi gat nazhi' da xtu men, orze' nak da nela tlë' yi'b kwa'n nichao' ruid namás, o nela tu plati kwa'n nibezh naye. ²No chi nzhak nidizha por Dios, nela tu profet ga', o nizobyeka rë kwa'n naga'ch che'n Dios, no nzhak da rë kwa'n nane men yizhyuo, mbaino haxta nanen rë kwa'n nane Dios; mbaino dox ñilan Dios haxta par len gan yubchi tu yi', per chi gat nazhi' da xtu men, yent kwa'n tsak da. ³No chi ki'za rë kwa'n kinun par ka' rë men prob, o chi zakzin kwerp da haxta lan yëke par gaknun men, per chi gat nazhi' da xtu men, yent cho kwent rë kwa'n nilen.

⁴Men xa' nazhi' xtu men, lo rë kwa'n nilinu men xa' nixek xa', mbaino dubta' wen xa'; no gat niwixt xa' ka' xa' kwa'n nak che'n xtu men, mbaino gat lë't mis lë' xa' nidi'zh, lë' xa'

wen; no ni gat nizi xa' marian. ⁵No gat nile't xa' kwa'n gat ñal, mbaino gat nikwa'nt xa' kwa'n wen par nab tsa lè' xa'; no ni gat nak xa' tu xa' lwegá' niyi'xian, no ni gat niguchao' xa' xian laxto' xa' por kwa'n nile' men lo xa'. ⁶Mbaino gat nidi'zht xa' tich rè xa' nile' kwa'n gat lè', sino ke nizak laxto' xa' or nile' rè men kwa'n wen. ⁷Men xa' nazhi' xtu men, or nizakzi men xa', gat nidi'zht xa'i; no gat lè't jwals yila xa' nakap tu men, mbaino kimbèz xa' zhin rè kwa'n mila' Dios di'zh; no or nizakzi xa', nane xa' par bien che'n xa' nila' Dios nizak xa'i.

⁸Nayot zhè lox, chizhi' be xtu men, per rè widi'zh kwa'n nidi'zh men por Dios, lè' zhè zhin, lè'i lox; no zhin zhè yotra' men xa' di'zh rè kwa'n laore gak; mbaino yotra' men xa' di'zh rè lo di'zh kwa'n gat nakbe't, no nayotra' men xa' di'zh rè kwa'n nab tsa Dios nane, ⁹porke nal, che'ptsa nane be, no che'ptsa nzhak nidi'zh be rè che'n Dios, ¹⁰per or yi'd Jesukrist xtu wèlt, Me nane rè kwa'n, par wei' Me be plo ban be par dubta', ze'se gat naki'ntra' be kwa'n che'ptsa nane be yizhyuo re'.

¹¹Or ngok da tu mè'd win, midizha nela tu mè'd win, milen xigab che'n mè'd win, mbaino miwi'n kwa'n wen mbaino kwa'n gat wen, ter kun xigab che'n mè'd win milene; per or ngok da tu men ro, tu lad milan rè che'n mè'd win. ¹²Nal gat nilibe't laka be xmod pa' nak Dios. Kure' nak lè'la or niwi' be lo be, lo tu spej kwa'n nilu' nacho'n; per or ban be kun Dios, lè' be ne Dios nela xmod niwi' be lo wech be; nal we'tsa nilibe' be Dios, per zhin zhè, lè' be libe' Dios nela xmod nilibe' Dios be. ¹³Kuze', dub tiemp kwa'n naban be lo yizhyuo re', chon kwa'n naki'n dubta' le' rè men che'n Jesukrist. Kwa'n galo nak, yila be, lè' Dios nichè'l kun be, por nak be men che'n Jesukrist; mbaino miche' Dios rè kwa'n nzè'b xki be. Kwa'n rop nak: rè or yila be, lè' Dios ne' kwa'n ka' be, rè kwa'n mila' Dios di'zh, ka' rè men che'n Me. Mbaino kwa'n mion nak: Chizhi' be tsa' men be. Per kwa'n más tsak lo yon kure' nak, chizhi' be xtu men nela be ka, porke kure' nayot lox.

Más tsak bichizhi' go tsa' men go

14 ¹Kwa'n ñal le' go, walipa' bichizhi' go rè men; mbaino nu bile' pa' go, par le' go rè zhi'n nazhon, kwa'n nile' Sprit che'n Dios. Xid rè kure', kwa'n más ñal le' go nak, di'zh

go por Dios nela tu profet ga', ²porke rē xa' nidi'zh rē widi'zh kwa'n yent cho nzhak, nab tsa Dios nane kwan nidi'zh bixa', no yent cho men zobyek kwa'n kidi'zh bixa' orze', porke por Sprit che'n Dios, nidi'zh bixa' rē xigab kwa'n kinu Dios naga'ch. ³Per xa' kwa'n nidi'zh por Dios nela tu profet ga', nizobyek men kwa'n nidi'zh xa', no nzhaknui par más ro'b xigab che'n rē men yado' lo che'n Dios, no par yi'd gan bixa' le' bixa' che'n Dios, mbaino rē xa' niwin laxto' nizi bixa' chul, ⁴porke men kwa'n nidi'zh rē widi'zh kwa'n yent cho gak zobyek, orze' nab tsa par lē' xa' nizu'i; per xa' nidi'zh por Dios nela tu profet ga', par rē men che'n Jesukrist nizu'i, orze' más nitse'd bixa' xmod ban bixa' lo che'n Dios. ⁵Na nzhakla, ter rē go di'zh rē lo di'zh kwa'n niyent cho nane, per más nzhaklan di'zh go por Dios nela tu profet ga', porke más tsak xa' nidi'zh por Dios ke xa' nzhak nidi'zh lo Dios rē lo widi'zh kwa'n yent cho nane. No chi nale' Dios gab xtu men kwan gab rē kwa'n mid'i'zh xa' re', orze' yent kwa'n zu'i par más rē men che'n Jesukrist.

⁶O gab be, yi'dtswi'n ma go wech no bizan, no yid dizha lo rē go rē di'zh kwa'n nazobyekt go, orze' yent kwan zu'i par go, sino ke kwa'n zu' par go nak, yid dizha tu kwa'n milu' Dios lon, par gon goi; o dizha kwa'n ne Dios lon, par más ro'b xigab che'n go lo che'n Dios; o dizha wanei xtu widi'zh che'n Dios par tse'd goi. ⁷Nal za' be kwent che'n rē yi'b kwa'n nzho'l men, nela flaut o harp; chi gat kiyol mene wen, orze' nagakt libe' be, cho di kiyol xa' kun lē'i. ⁸No se'ska lo tu yēr, chi lē' xa' nzho'l trompet nakwe'zhe wen, orze', ¿xmod libe' rē sondad cho di kiyol xa', no par zo rē sondad list par dil xa'? ⁹No se'ska nzhak kun go, chi nadi'zh go rē widi'zh kwa'n nazobyek men, orze', ¿xmod ne men kwan kidi'zh go? Nak go orze' nela xa' nab tsa lo mbi kidi'zh. ¹⁰Walika, rē lo widi'zh kwa'n nzho yizhyuo, mbaino kad yezh nilibe' xti'zh, ¹¹per chi gat nizobyeka kwan gab tu widi'zh kwa'n kidi'zh tu men lon, orze' nak da par men ze' nela tu xa' nzē xtu plo, no nazu't da xti'zh xa'; no se'ska nak xa' par da. ¹²Kuze', rē go xa' nixo'byek le' zhi'n nazhon por Sprit che'n Dios, bile' pa' go par le' go más wen rē kwa'n zu' par ro'b rē men che'n Jesukrist lo che'n Dios.

¹³Kuze', xa' nzhak nidi'zh xtu ben di'zh kwa'n niyen cho nizobyek, ñal na'b xa' re' lo Dios, par le' Dios gak gab xa'

kwan gab rē kwa'n di'zh xa', ¹⁴porke chi na'ba lo Dios kun rē widi'zh kwa'n gat nizobyekta', orze' kun sprit da kina'ba lo Dios, porke naneta kwan kidi'zha. ¹⁵Orze', kwa'n ñal len, naki'n na'ba lo Dios kun sprit da, per nu lene, nen kwan gapa or na'ba lo Dios. Mbaino naki'n kē'n kant kun sprit da, per nu ska naki'n len xigab or kē'n kant par nen kwan dizha, ¹⁶porke chi kidi'zhal nazhon Dios, kiza'l xkix lo Dios kun nab sprit che'nal, no gon tu xa' nanet xmod nak che'n Dios, kwa'n kidi'zhal, orze' nagakt zubi xa' lol par ne xa': “Walika kwa'n kidi'zhal”, porke nagont xa' kwa'n kidi'zhal lo Dios. ¹⁷No ter nanel, dox wen kiza'l xkix lo Dios, per par xtu men, nazu'te par ro'b xigab che'n xa' lo che'n Dios.

¹⁸Nizan xkix lo Dios, porke más nzhak da lo rē go, nidizha xtu ben di'zh kwa'n ni tu go nanet, ¹⁹per or nzon le'n yado' xid rē men che'n Jesukrist, más nzhaklan dizha gai'tsa widi'zh kwa'n zobyek bixa', no zu'i par tse'd bixa' ke par dizha chi' mil widi'zh kwa'n nagont bixa' kwan.

²⁰Rē go wech no bizan, nale't go xigab nela mē'd win ga', sino ke gok go nela mē'd win ga' le't go kwa'n nakap; per bile' go xigab nela che'n rē men xa' miro'b la xigab che'n lo che'n Dios. ²¹Se' nzobni' lo Yech che'n Dios, nzhab Dios:

Lē'da dizh lo rē men re' kun rē widi'zh kwa'n
gat nakbe't,
mbaino dizha lo bixa' kun rē widi'zh che'n rē
men zit,
per ni kun ter midizha sa', nangont bixa' ro'n.

²²Kuze', or nidi'zh men che'n Jesukrist xtu rē di'zh kwa'n gat nakbe't, par rē men xa' gat ñilat widi'zh che'n Dios, kure' nak par lē' bixa' nela tu señ ga', lē' Dios zakzi bixa'. Per or nidi'zh rē men che'n Jesukrist tu kwa'n nzhab Dios lo xa', nela tu profet ga', kure'se zu' par más ro'b rē men che'n Jesukrist lo che'n Dios, no gat lē't par rē men gat ñilat Diose. ²³O gab be, or nibin go lo kult, orze' rē go zublo di'zh xtu ben rē di'zh kwa'n yent cho men nzhak, no orze' zhin tu xa' nanet xmod nak widi'zh che'n Dios, o tu xa' gat ñilat Dios, orze' lē' xa' le' xigab, nzhak miyizh go, por kidi'zh go sa'. ²⁴Per chi kidi'zh go por Dios nela tu profet ga', no orze' yo tu xa' plo nibin go, tu xa' gat ñilat Dios, o xa' nanet xmod nak widi'zh che'n Dios, orze' lē' xa' ze' gon kwan kidi'zh go, no lē' xa' zi nzē'b xki xa'

lo Dios, ²⁵no orze' lè' kwa'n naga'ch kwa'n nzho laxto' xa' re', lè'i ro' al tich, orze' lè' xa' zuxib lo Dios, mbaino zi xa', walika nzo Dios kun go.

Bile' go kwa'n ñal, or nile' go kult

²⁶Rè go wech no bizan, lo rè kwa'n nin re', kure' ñal le' go or nibin go. Gak kè' pla go tu kant nazhon lo Dios, no zipla go gak lu' widi'zh che'n Dios lo más rè men, o di'zh zipla go tu kwa'n milu' Dios lo go, o di'zh go tu rè di'zh kwa'n gat nakbe't, mbaino xtu go gab kwan gab rè widi'zh ze'. Per rè kwa'n le' go re', naki'n le' goi, nab tsa par más yila go widi'zh che'n Diose. ²⁷No or di'zh tu rè go xtu ben rè di'zh kwa'n gat nakbe't, ñal choptsa go o chontsa go di'zhe; mbaino tu go naki'n di'zh kwan gab rè widi'zh kwa'n midi'zh go re'. ²⁸Per chi yent cho go gak gab kwan midi'zh tu rè go re', orze' más wen nadi'zhtra' rè xa' re' lo rè men yado', rè di'zh kwa'n nazobyekt men kwan gab, más wen nab tsa bixa' di'zhe par bien che'n bixa' namás, mbaino kure' ño laxto' Dios.

²⁹No se'ska, xa' kwa'n di'zh por Dios, xa' nak profet, namás di'zh chop xa' o chon xa', no más go naki'n xe gon goi, par nabei, chi walika widi'zh che'n Dios kidi'zh rè xa' re'. ³⁰Per chi lè' Dios le' di'zh xtu rè xa' nzob xid go, tu kwa'n milu' Dios lo xa', orze' ñal nadi'zhtra' rè xa' kwa'n kile' Dios kidi'zh galo re'. ³¹Se ñal di'zh tuga' go kwa'n ne Dios lo kad go, par gak tse'd go kwan le' go, no par más yi'd gan go lo kwa'n nak che'n Dios, ³²no lo kad xa' nidi'zh por Dios, niza' Sprit che'n Dios xigab par ne xa' or ñal di'zh xa', mbaino or kwèz di'zh xa', ³³porke Dios gat nzhaklat ngokla ngwa, sino ke Dios nzhakla kwin bixa' nela xmod ñalkai.

Nela xmod nzhak ka xid más rè men che'n Jesukrist plo nzhin bixa', ³⁴ñal xe zob rè una' lo kult le'n yado' plo nibin go, porke gat ñalt di'zh bixa' tu kwa'n lo rè go, sino ke gon bixa' ro' xmiyi' bixa', nela xmod nzobni' ka lo ley kwa'n mila' Dios lo Muisés. ³⁵No chi nzhakla tu una', na'bdi'zh xa' kwaliskier tu kwa'n, más wen na'bdi'zh xa'i lo xmiyi' xa' or nzho xa' lizh xa'; porke gat ñalt di'zh tu una' le'n yado', or nzhak kult.

³⁶Bitsila go, gat lè'ta' galo laka xid go nguro' men kwa'n milu' widi'zh che'n Dios galo laka; mbaino ni gat lè' galo laka go mbin widi'zh che'n Dios lo más rè men.

³⁷No chi nzho tu xa' xid go, xa' nile' xigab, nak xa' profet, xa' nidi'zh por Dios; no chi ñila xa' lè' Sprit che'n Dios nile' rē kwa'n nazhon kun lè' xa', orze' ñal libe' xa', walika lè' Jesukrist mile' mandad da, mizobni'ne lo yech par gon goi. ³⁸No chi nzho tu xa' nzo lo nakao, nagat yila xa', lè' Jesukrist mile' mandad da kidizha rē kure', lè' xa' wane, yentska cho wi' lo xa'. ³⁹Kuze' rē go wech, bile' pa' go par gak go xa' nidi'zh por Dios, no bila' go di'zh rē xa' kwa'n nidi'zh xtu ben rē di'zh, kwa'n niyent cho nane, ⁴⁰per lo rē kwa'n le' go, bile' goi, nela xmod ñal kai.

Walika, nguruban Jesukrist

15 ¹Nal, nin lo rē go wech no bizan; nzhaklan tsila go widi'zh nazhon che'n Dios kwa'n milun lo go, no kwa'n ngwayila go, mbaino widi'zh nazhon che'n Dios re', nak nela tu simient par go, porke haxta nal re', se'gaka ñila goi, ²no por widi'zh nazhon re', lè' go ban kun Dios par dubta', chi lè' go se'gaka yila widi'zh re'; per chi nayilara' goi, orze' yent cho kwent ngwayila goi.

³Xid rē kwa'n mitse'da galo laka, nak, lè' Krist ngut por rē kwa'n nzè'b xki be. Kure' milun lo go galo laka, nela xmod nzobni' ka, ⁴mbaino miga'ch Krist, per ngubizh mion, lè' Me nguru'ban, ⁵mbaino galo laka ngurulo Krist lo Per, orze' lo za tu dusen apost che'n Me; ⁶dispwes ngurulo Me lo más di gai' gayo' men che'n Me; no mer rē xa' re' se'gaka naban. ⁷Orze' ngurulo Krist lo Jakob, no lo más rē apost. ⁸No lult, ngurulo Jesukrist lon, na nak nela tu më'd ngol gat za mbëo', ⁹porke xid más rē xa' nak apost, na nak xa' natsakt be's, no ni gat ñal ru'lè da tu apost, porke nguru'kè'n tich rē men che'n Jesukrist, no dox mizakzin bixa'. ¹⁰Per por dox milats laxto' Dios da, kuze' nak da tu apost che'n Dios, per gat lè't yent cho kwent milats laxto' Dios da, porke más zhi'n nazhon milen ke kwa'n mile' más rē apost, per gat lè't kun mis jwers da milene, sino ke Dios ngoknu da por nilats laxto' Dios da. ¹¹Per ni más rē apost, no ni na, yent cho más tsak. Kwa'n más tsak nak, nidi'zh no lo rē men, par yila bixa' Dios por Jesukrist, Me kwa'n ngwayila go.

Rē men ruban

¹²No chi rē no, xa' nak apost che'n Jesukrist, nidi'zh no lo men, lè' Jesukrist nguruban, orze', ¿chon nidi'zh pla go:

“Gat walit ruban rē men ngut”? ¹³Pwes chi gat wali, ruban men ngut, orze!, ni Krist nangarubant ska, ¹⁴no chi gat wali, nangarubant Krist, pwes orze! yent cho kwent milu' no widi'zh che'n Me lo go, no yent cho kwentska ngwayila goi orze!. ¹⁵No chi lē'i sa' nak, pwes rē no, xa' nidi'zh widi'zh che'n Dios, orze! midi'zh no kwa'n gat wali por Dios, porke nidi'zh no, mile' Dios, nguruban Krist. No chi lē'i gat wali, ruban rē men ngut, ¹⁶orze! ni Kristska gat walit nguruban, chi lē'i sa' nak. ¹⁷No chi nangaruban Krist, orze! yent cho kwentska ngwayila go widi'zh che'n Krist, mbaino se'gaka nzē'b xki go lo Dios. ¹⁸No chi lē'i se', rē xa' kwa'n ngut, dub ñila xa' Jesukrist, orze! milox bixa' tulix. ¹⁹No chi nab tsa par yizhyuo re' zu' kwa'n ñila be Krist, orze! be más nalats nizak lo rē men yizhyuo por zhe'b tont be.

²⁰Per walika, mile' Dios nguruban Jesukrist, no nak Krist nela tu xlē galo laka che'n tu kusech, porke lē' Krist galo laka nguruban. ²¹No por dol che'n tutsa miyi!, rē men ño nzhat, mbaino se'ska por kwent che'n xtuska miyi!, rē men ruban. ²²No sa!, nguio nzhat men, por Adán, mbaino se'ska por kwent che'n Krist, rē men ruban. ²³Per kad men ruban tiemp kwa'n ñal kad xa': Galo laka nguruban Krist, dispwes ruban rē men che'n Krist, or yi'd Me xtu wēlt yizhyuo re!. ²⁴Or zhin zhē lult, or le' Krist gan lo rē mbi kwa'n más kinu poder par le' mandad, mbaino lo rē mbi kwa'n gat kinut be's poder, no haxta lo rē mbi kwa'n más wē' kinu poder; orze! wei' Krist rē poder re' lo Xuz Me Dios, ²⁵porke lē' Krist sigue le' mandad, haxta le' Dios gan, zubi rē xa' re' lo Krist, rē xa' kwa'n nidil kun lē' Me, par le' Krist mandad lo rē. ²⁶No or mile' la Krist gan lo rē xa' nidil Me, lult laka le' Me gan lo xtutsa xa', xa' re' nak ganj che'n Mizhab kwa'n lē La Muert. ²⁷Lē' Dios miza' yalnazhon nka' Jesukrist par le' Me mandad lo rē. Per or nzhab Yech che'n Dios: “Miza' Dios yalnazhon nka' Jesukrist”, per nab tsa lo Dios nagakt le' Jesukrist mandad, porke Dios nak Me miza' yalnazhon nka' Jesukrist. ²⁸No or le' Krist mandad lo rē kwa'n nzho, orze! zhireska Me rē yalnazhon lo Xuz Me Dios, par nab tsa Xuz Me Dios le' mandad lo rē kwa'n nzho, haxta lo Yub Jesukrist, le' Dios mandad.

²⁹No chi nile' go xigab, narubant men ngut, orze!, ¿kwan le' rē xa' gan, xa' nzhaklēi' lugar che'n men ngut, chi naruban

men ngut orze'? Orze', ¿chon nzhakläi' men, por xkwent men ngut la? ³⁰No chi lë'i sa' nak, yent cho kwent zilita' nided no lo kwa'n nila' gut no. ³¹Walika nin lo go, wecha; nizak laxto'n lo Señor Krist Jesús por go, no nin lo go, walika, zilita' nzho xa' nzhakla gut da. ³²Orze', ¿kwan milen gan, or ndila kun rë men xa' nak nela tu mbe'zh ga' lazh men Efeso? Chi lë'da ndil por kwa'n yizhyuo re', orze', ¿kwan mizu'i par da? Chi lë'i gat wali, ruban men ngut, orze' más wen nela nidi'zh ka rë men: “Nal wen be, gao be no go be, porke yë' lë'be gat.” ³³Nakidet go lo mis go, nela nzhab ka tu di'zh: “Nachë'lta! kun men nakap, napa ke'd xa'i lu, orze' nale'tra'l kwa'n wen.” ³⁴Wenawen bile' go xigab, par nale'ra' go kwa'n gat lë' lo Dios, porke nzho pla men xid go, xa' gat lë't men che'n Jesukrist. Nin kure' lo go par tula rë xa' ba'.

Xmod ruban rë men ngut

³⁵Pas nzho go nzhakla gon, xmod ruban rë men ngut, o xmod nak kwerp, gap bixa'. ³⁶¿Zhe'b nad yek go, par ne go kuba'!, porke or nixë'n men wanei cho lazh tu ya, naki'n galo laka yao'yo lazhe, orze' lene par gake tu yaye'n. ³⁷No gat lë'ta' yaye'n kwa'n nilen ze' nigo men lo yuo, sino ke lazh kwa'n nzha'n bixa'i, lë'la tu nzhob, o wanei cho xtu lazh rë kwa'n. ³⁸No kad lazh kwa'n nzha'n men, nizuxkwa' Diose nela xmod ñola Dios. ³⁹Gat lë'ta' tutsa nakxao' rë kwerp. Xa' mod nak kwerp che'n men, no xa' ga' mod nak kwerp che'n ma, mbaino kwerp che'n miyin no kwerp che'n rë mbël, xa' mod nakxao' kade. ⁴⁰Pwes se'ska nzho kwerp yibë', mbaino nzho kwerp yizhyuo; chul nakxao' kade, ter xa' mod nilu' rë kwerp kwa'n nzho yibë', lo kwerp kwa'n nzho yizhyuo. ⁴¹Xa' nak biani che'n ngubizh no che'n mbëo', no xa' nak rë ki che'n rë mbël lo yibë', mbaino kad mbël kinu xmod nizini.

⁴²No se'ska gak or ruban men ngut. Or niga'ch kwerp che'n tu men ngut, ñëb kwerp che'n xa' le'n ba', per or ruban xa', xtu mod gak kwerp che'n xa', nayotra' yëbe. ⁴³Niga'ch tu kwerp ngut kwa'n nazu'tra' no milox jwers; per or ruban xa' re', dox chul gak kwerp che'n xa', no naye'i, mbaino nayotra' loxe. ⁴⁴Or niga'ch tu men ngut, kwerp yizhyuo kinu xa', per or ruban xa', gap xa' tu kwerp kwa'n nayot lox. Kuze', nzho kwerp kwa'n nzho yizhyuo re', mbaino nzho kwerp kwa'n

nayot lox. ⁴⁵No nela nzobni' lo Yech che'n Dios, miyi' galo xa' lè Adán, mile' Dios, ngok xa' tu men kinu yalnaban; per Jesukrist, Me mbi'd lult, mbaino ngol Me nela Adán ga', per por nguruban Me, mile' Dios, lè' Me kinu yalnaban kwa'n nayot lox, par za' Mei ka' rë men yila Me. ⁴⁶Per gat lè't galo laka yalnaban kwa'n nzë yibë' nguio, sino ke galo laka kwa'n nzho yizhyuo re'i, dispwes nguio kwa'n nzë yibë'. ⁴⁷Miyi' galo laka kwa'n nguio, ngokxao' kun yuo; lè' miyi' mirop nzë yibë', Me nak Jesukrist. ⁴⁸Rë kwerp che'n men yizhyuo, nak nela Adán ga', xa' ngokxao' kun yuo; per rë xa' miza' Jesukrist yalnaban ka', nak nela Jesukrist ga', Me nzë yibë'. ⁴⁹Mbaino miban be nela xmod miban Adán ga', xa' ngokxao' kun yuo. Per nal, naki'n ban be nela Krist ga', Me nzë yibë'. ⁵⁰Nal, nzhaklan nin lo rë go, wecha; nagakt yo kwerp kwa'n ngolnu be yizhyuo re' plo nile' Dios mandad; mbaino ni nagak yo kwa'n nilox plo nzho kwa'n nayot lox.

⁵¹Rë go wech no bizan, nzhaklan gon go kwa'n kinu Dios naga'ch: Gat lè't rë be gat, per rë be bixlo. ⁵²Tu rrat tsa, nela or niti'b men lo men, no xa'l xa'i, or kwezh lult trompet, porke trompet kwezh, orze' lè' rë men ngut, xa' nak men che'n Jesukrist, ruban; orze' lè' rë be, xa' stubi naban, lè' kwerp che'n be bixlo, ⁵³porke kwerp che'n be kwa'n nzë yizhyuo re', lè'i bixlo par gake kwa'n nzë yibë', porke kwerp che'n be kwa'n nzhat yizhyuo re', lè'i bixlo, par nayotra' gate. ⁵⁴Mbaino or bixlo kwerp che'n be kwa'n nzë yizhyuo re', orze' gake kwa'n nzë yibë', no or bixlo kwerp che'n be, orze' gake kwa'n ban par dubta', par gak rë widi'zh kwa'n nzobni' re':

Milox La Mwert, porke Jesukrist mile' gan lo
La Mwert.

⁵⁵La Mwert, ¿ma kwa'n mile'l gan, por mizakzil men?
Mbaino, ¿ma poder kwa'n miza'l yalne men, no
mbital men?

⁵⁶Kwa'n nzë'b xki men lo Dios nak kwa'n nile' nzhat men, mbaino ley kwa'n mila' Dios lo Muisés mile' nzë'b xki men lo Dios. ⁵⁷Per ñal za' be xkix lo Dios, Me ngulo' be lo rë kure', por kwa'n mile' Jesukrist por be, Me nile' mandad be.

⁵⁸Kuze' rë go, wecha, xa' nazhi' da, nala't go kwa'n nile' ñila go Jesukrist dub tiemp kwa'n naban go, mbaino zilita' bile' go zhi'n nazhon che'n Dios dub la go, porke lè' go nane

ka, gat lè't yent cho kwent zhi'n nazhon kwa'n nile' go, por nak men che'n Jesukrist.

**Gan dimi par rē men che'n Jesukrist
xa' nzhin rē yezh che'n men Israel**

16 ¹No rē dimi kwa'n gan par rē wech be, xa' nak men che'n Jesukrist; bile' goi nela xmod nzhap ka, le' rē men che'n Jesukrist, xa' nzho rē yezh che'n rē men Galacia. ²Rē zhē Doming, zen kad go tu dimi yek rē dimi kwa'n nile' go gan, dike kwa'n nzhax ka' go, par kinu chao' la goi or yala, nes mis na kane lo go. ³No or yala, ya ngule la go rē xa' kwa'n wei' dimi re', mbaino nu tu yech bizuxkwa' go por lè'i, nes par or yala lo go, xēla bixa' par wei' bixa' kwa'n miza' go dub la go, par rē wech be xa' nzho yezh Jerusalén. ⁴No chi kube'u, nu da ñal ya, pwes ya no kun lè' bixa'.

Xigab kwa'n kinu Pab plo ya xa'

⁵Par zhi'na lo go, naki'n de'da rē yezh kwa'n ña'n lazh men Macedonia, orze' zhi'na yezh Corinto plo nzhin go. ⁶Orze' kitla yana che'p kun go, o pas yana dub rē mbēo' nayag lo go; orze' gak gaknu go da plo nilen xigab yan dispwes, ⁷porke gat nzhaklata de'da nayen lo go, sino ke nzhaklan yana che'p xche kun go, chi lè' Señor ziyēl. ⁸Per nzhaklan yana yezh Efeso, par de'da lani kwa'n lē Pentecostés ba', ⁹porke yezh Efeso, nzho nayax xa' nzhakla tse'd widi'zh che'n Dios, ter nu nzho nayax men ba', xa' kwa'n niyi' nine da por nak da men che'n Jesukrist.

¹⁰No chi zhin Timoteo lo go, chul bile' go lo xa' par zi xa' chul xid go, porke lo mis tutsa zhi'n nazhon che'n Jesukrist nilen kun lè' xa'. ¹¹Kuze' nawi't go lo xa' gat lè'; sino ke gulunez go xa' chul, par nizak laxto' xa' zhin xa' re', porke na kun zipla wech be por Jesukrist, kimbēz no zhin xa'.

¹²Lo Pol wech be, dox mina'ba lo xa', no lo nu zipla wech be, par yi'dtsi' bixa' ma go, per ne xa', nagakt yi'd xa' nal re', sino ke lè' xa' yi'dtsi' ka ma go, per haxta or gake.

Lult kwa'n midi'zh Pab

¹³Bikina go go, no wayila go widi'zh che'n Jesukrist zilita', no nazhebt go lo ni tu kwa'n, no naye guzo go kun Dios. ¹⁴No rē kwa'n le' go, bile' goi kun dub laxto' go por nazhi' go men.

¹⁵Wecha, rë go nane, lë' melizh Estéfanas nak rë xa' kwa'n galo laka ngwayila widi'zh che'n Jesukrist, xa' nzho tu rë yezh kwa'n nzhin lazh men Acaya, mbaino dox nzhaknu bixa' rë men che'n Jesukrist kwa'n nzho ba', kuze' kina'ba lo go, ¹⁶gon go ro' rë men re', no ro' más xa' nikë mis rë zhi'n nazhon che'n Dios, nela rë xa' re'. ¹⁷Dox nizak laxto'n mizhin Estéfanas lon, kun Fortunato no kun Akaiko; pwes rë men re' mile' rë kwa'n por da, por niyen go re'. ¹⁸Lë' bixa' mile', mizi da chul, no nu rë go mizi chul; kuze' ñal ne go, rë xa' nak nela lë' bixa', dox tsak bixa'.

¹⁹Lë' rë men che'n Jesukrist xa' nzho yezh re', plo nak lazh men Asia, mixë'l tu widi'zh wen par rë go. No nu Aquila kun tsa' xa' Priscila, no nu más rë xa' nak men che'n Jesukrist kwa'n nibin lizh rë xa' re'; rë xa' re' mixë'l tu widi'zh wen par rë go. ²⁰Rë wech be xa' nak men che'n Jesukrist, xa' nzhin re', mixë'l tu widi'zh wen par rë go; no nu ska go, guzen go ya' rë wech go, uni' go lo bixa' kun dub laxto' go.

²¹Na Pab, kixëla tu widi'zh wen re' par rë go; kun mis letr ya'n mixë'lai par go.

²²Chi nzho men xid go, xa' gat nazhi't Señor Jesukrist, nzhi'bde la xa' re' lo Dios. ¡Lë' Señor Jesukrist, Me nile' mandad be, ya mer la yubre!

²³Lë' Señor Jesukrist gaknu rë go. ²⁴Nazhi' da rë go por Krist Jesús, Me nile' mandad be. Sa' gake.